

同安縣志

卷卅二 人物錄 獨行
人物錄 忠義

卷卅五 人物錄 循吏

卷卅三 人物錄 孝友

卷卅四

同安縣志卷之三十一

獨行錄 附高士

孔子稱逸民謂天下之民歸心重獨行之士也洪崖創高蹈於上皇時代許由善卷不降節於唐虞之朝蓋隱居求志負貞亮之節以自放於山巔水涯間池沼足漁春稅代耕逸士高人古聖賢且嘖嘖稱道矣雖然真能以獨行稱未易言也昔皇甫謐作高士傳夷齊兩龔且不得錄執此以繩天下士尙難其詣况僅一邑耶究之春秋重子臧之節明堂月令亦以季春禮名士一節自堪千古固不必被衣王倪齧缺巢父亦可以風下此如型仁講讓見義勇爲與夫亮節高風足爲世範雖非極詣仍宜表彰因志獨行而以高士附焉

唐 謝 脩

宋 石 蕢

明 陳真泰

黃 軫

池浴雲

魏秀才

胡乾篤

劉 恭

陳 俊

陳必敬

陳樸軒

林 湍

呂誠源

傅 琪

洪 俊

劉夢龍

黃朝緒

李 璋

劉紹彖

柯揚

蔡鼎臣

葉振揚

林牧

周仕慶

蘇商霖

林晃

周國賓

蔣懷忠

蘇思義

吳達一郭榜

蘇震亨

池浴沂

王三聘

陳廷佐

蔡祚

李霖慰

黃蘭芳

張賁垣

莊獻

洪居正

蔡紹英

王高立

王覲

鄭師

阮伯宗

阮旻錫

葉啟麩

葉迎

紀文疇

紀許國

紀保國

莊潛

林霍

陳則賡

林志遠

楊期演

楊秉機

林嘉采

葉后詔

李樹官

清

王士豫

陳雲初

王良

陳維衡

陳孝宗

吳曾芳

王朝俊

蘇未觀

劉彭齡

陳御飛

金友

陳王春

陳錫英

林芳德

周廷樑

黃錫時

呂文遇

李擎輝

陳夢熊

陳秉義

陳邦寶

陳思敬

王瓊林

高育茂

童重器

陳廷振

顏丹書

張添

葉時泰

陳澧

曾鑄

蘇國鑄

胡鉉

顏文禡

唐

謝脩字升之有畸行自廣明西幸人多忍恥事北獨脩遁跡俟光啟回鑿迺出登文

德元年進士脩詞藻過人時輩推許所居之山因名文圃

舊志府志

按謝脩舊志列諸外紀似於例未合泉州府志列諸列傳不為無見第考其事蹟固高行者流也今特采入獨行傳

宋

石贄字蕃甫以世胄薄遊鯁論忤世浩然而歸崇寧中隱於文圃山詞藻清節推重

一時嘉定間邑人楊志為作三賢堂與謝脩洪文用合祀

魏秀才逸其名居浯江上有太上隱者之風邱葵贈詩二章其一屋茅蕭索泣寒蟲

獨自吟詩學已工敗葉能令溝水黑亂雲不放夕陽紅半生辛苦空儒服一歲蹉

跼又朔風不意窮鄉有奇事暮春得拜席門翁其二月淡蓬門掩候蟲窮通底解

問天工茶烹粟面紛紛白燈吐花心灼灼紅屢改新吟添硯水密糊舊稿護窗風

相逢莫道龐公老覽鏡先慚似老翁

舊志閩書

陳必敬號樂所陽翟人少穎悟通五經諸子百家言宋末一舉不遇遂不復出嘗與邱葵講明濂洛遺學所著有詩聯遺文其詠釣臺詩云公為名利隱我為名利來羞見先生面黃昏過釣臺又云已上桐江臺又弄桐江釣不食桐江魚不怕嚴公笑二詩人傳誦之

明

陳真泰字乾通

舊志作乾道

唐場老之後家富好施遇義舉必力為之與弟陽泰人呼為

二長者值歲饑出粟賑鄉里咸享實惠年九十五終曾孫華玖宏治舉人

閩書府志陳

氏家乘

胡乾篤父克裕有孝德偕妻雙壽至九十一歲乾篤事親孝謹好善行義成化辛丑援例納票給冠帶造余塘溪橋以利行人既訖工請父母行橋上效舞綵戲鄉人羨之於赤泥山立義冢修理枯骨邑令龍越作忠義堂旌之子廷銘亦有孝行曾孫明佐萬歷壬午舉人壬辰進士累官山東參政

閩書府志

陳樸軒陽翟人為經歷書記成化初大小嶴民以通夷內徙委經歷查勘樸軒極陳

嶠民化離狀代畫保全策經歷如指言之全活甚衆建祠勒石頌之

傅琪字質溫號禾江少讀書了晰經史尤好通鑑能舉其首尾嘗讀至所記強項令而追歎之曰斯丈夫矣父年已老琪不辭筋力服賈爲養時時轉販米穀於漳泉閒時其貴賤爲往來不多取人直有多直輒舉還之有兄二人曰琮曰珍珍逮繫省獄琪橐餽以從力爲訟寃出之亡何珍客死福安人謂道遠火之便琪不從以櫬歸及父與長兄琮同日卒哀毀幾不欲生撫二孤姪恩養備至爲之有室子鎮幼穎慧勉之曰學則庶人之子爲公卿及十五歲爲諸生有文名又誡之曰文莫吾猶人也其當先士行及舉進士馳書示之曰幼學壯行此其時矣鎮歷官著清節俸餘無羨益心喜之邑令屢致鄉賓勉一就鄉有兄弟爭田者求琪居閒則將挈田相畀琪留與共酌反覆諭之曰辱君意誠厚顧君視予於兄弟孰戚哉何不以讓兄弟而獨畀予其人愧悔去遂敦好如初以子鎮貴封御史年八十而卒

黃朝緒字志理號廣堂賦性嚴厲治家勤勉經畫精密家故饒值中落奮然有恢復之志念父祖祀典未備割己業若干以爲祭田又規畫祠堂規制以遺後人嘗誨諸子曰心志萬事之綱心堅石穿志勁石軟男兒無志焉攸立哉又訓其子國濟

曰爾讀書當如吾治稼播種芟耘必以時糞溉必以力則稼雖與人同所穫必與人異讀書亦如是又戒諸子保身守家之道歷舉積不善之有餘殃者以爲鑒人或負己則曰寧人負我尹我負人見人戚戚於貧富則曰不願大大富不願小小貧不願人求我不願我求人其言皆有道如此

節林次崖文集

黃軫字伯禽號質庵守真抱朴督僮僕耕種樹藝晝夜冒風露觸豺虎無畏阻履林麓窮陵谷歷溝澗波池井塍不爲勞不數年大致豐裕性儉約布衣蔬食不事華美安常守分不作非爲賦役以時供億姓名不登官籍吏卒追呼鮮踵其門家無外事飢食渴飲夏嘲松風冬暄榆日呼童沃林果灌園蔬理籬菊興至牽獵犬逐麋鹿射雉兔客至設供具留飲投壺引白盡醉而散宗族鄉黨無怨姻親感其惠朋友服其信所謂一鄉之善士者

節林次崖文集

劉恭字大受號鐵山雄曾孫少孤奉母王氏以居諸父叵測利其業謀殄之恭幼卽多智遵母教潛形謹跡不踐禍機昏夜出入自防飲食心動輒不苟諸父知不可殄則漁奪其產耗之恭泣謂母曰他日兒能自有之勿與爭旣長娶於葉奉母僑居以避難自力於勞窶艱躓中忍悶耐侮與人同勞逸甘苦遇寒飢推共衣食赴

人緩急風雨疾病期至不爽晷刻人多願効死力色温詞摯論事多中善灼人隱而樂善諱過所譏獎人同勸阻鄉人有構者多解去既漸致富御財有義多縱弛以賑貧窮惡菲服食不邇於驕佚莫有怨妬者其後諸父以凶終諸孤淪落存者蕭然恭復撫卹之爲時婚嫁營貲產人咸難之俗俠武鬪訟恭獨延名師課子風示里中子存德爲御史疏諍廟議與儉人異同或傳至家謂禍且不測恭抗聲曰主聖臣直何憂卒不害及子爲松江守遣輿卒迎養人謂地多珍物民吏善事長官宜往饜享恭曰使吾至郡邸且閉門杜徑民吏何由見而且吾在家顧不饜享耶輿卒空還惟貽書勉以守官愛人而已年六十九卒

節王適巖文集

林湍字其東號滌川亨泥人生十月而孤與母及女兒適呂者相依爲命幼警敏有至性孝事母而敬姊姊嘗割其埔下租弗禁已而復取租里嫗恚湍止之曰是粟林而歸呂何也湍曰女兒也卒無所問母疾朝夕侍沒以已分地營葬父所遺業二兄獨多取湍聽之急人若身有謁必竭其情以和讓睦族黨胥敬而愛之女適諸生陳墀墀沒翼寡女以立二孤內弟幼撫而成之中年家稍落躬耕自給值倭訂濱海鳥獸竄骨肉或相失盡室先之山林海島中得無害疫癘盛行其家獨免

人謂德報及子舉進士爲南京部郎往視之勛以忠孝毋負其官會覃恩得封奉

政大夫子一材隆慶辛未進士累官參政

節遜菴全集

洪俊字子才號見泉少讀書不喜帖括棄去治耕父母繼歿季弟方幼兒遺孤在抱謂妻曰吾任父若任母其卯翼之以克有家有無相通鷄犬桑麻相望歲時酒食相勞雖室罄必具食輟哺寢分襟毫無岐視值海寇棘居民鳥獸散有父執彭姓篋金百二十兩來寄以亂辭彭曰得失有命子不吾負吾亦未嘗告吾子也既受命懷篋俱臥起寇退而返之曰幸不辱命里中團結社兵捍賊鷺門有攻石者八人自南安來衆曰諜也攫其囊金去且將沈之水俊挺身持不可曰傭也若之何賊之吾且白諸官矣卒還金而以八人免族有惑形家言者修父母骸襲祖塋穴事甚陰不可禦爲盟香質山靈以秘計護之卒不侵甲子正月賊猝至挈妻子避入後堡堡湫窄賊連陷沈井諸寨鍾攻堡瓦石皆震忽賊相驚呼散去則戚將軍兵至也其存亡間不容髮人謂德報子曰觀萬歷辛卯舉人金華府推官贈父

如其職

節遜菴全集

李璋字振載號象明潮州守春芳子三歲而孤母翼之年十六爲諸生旋遊南雍縱

觀金陵山水友天下士歸放浪耳目自娛散千金弗顧以母病稍斂飭然好結客
浮白終日不厭每遠遊輒停舟車僦一驢周覽形勝辨其風謠土物曰以廣吾陋
兼寫旅懷久之以例予上林苑監錄事秩需次二年除良牧署司課無苛署既暇
益多從長者遊中丞郭維賢愛之款談甚洽出爲吳江主簿維賢贈以詩至蘇守
令咸優遇之吏材敏決不懾強禦案無留牘未幾卒於官璋雖豪雋而篤倫物莊
事繼母遇譙呵必介所親祖跪謝撫大宗之孫於孤幼而助之室推財多所施舍

鄉人皆義之

節遜卷全集

池浴雲字仕卿號龍洲幼穎慧嫻駢語稍長失恃哀毀成禮孝事繼母友愛異母弟
年二十一爲諸生名駸起初試不售卽築精舍于五老山中希跡城市得李地師
卜地葬母葬時有雙鶴集其旁人謂孝感會妻病而李師被誣逮繫聞而愀然曰
李君良友坐視其非辜而不白之視貫高纒布愧矣人以內恙難之妻廉其志愆
愚之曰余體稍和第行無慮竟脫李獄載與歸生平絕貴介氣亦未嘗干有司遇
試皆前列再赴秋闈已收復棄歸益自奮曰吾當探石渠天祿之祕爲宇宙第一
名流但以帖括家博第非傑也至建州購書數千卷還而卒業焉未幾病卒年三

十四鄉人爲鑄龍洲臥岡四字於五老山石

節見巖集

陳俊字克位號宅洲陽翟人健孫少穎嗜學與兄榮祖榮選俱以文名萬歷癸卯應歲貢越五載授福州府訓導省會送迎甚劇浩然曰吾老矣安能爲首蓓折腰遂不赴杜門撰述以文事課子孫又十年卒俊事父母色養維謹居喪以毀名恭事二兄商質古今常至夜分雖老有讓梨意壯年喪妻矢不再娶生平慷慨好義嘗捐己以集事而不自見德寓長安有同年告窘傾囊周之惠安鄭生同貢暴卒殯而哭之哀雅甘澹泊諸子或以輕煖肥甘進亟麾去曰此非儒味所宜居恒每以無求安飽恥惡衣食懷居三章反覆誦之邑令嘉其恬守舉鄉賓子穀萬歷庚子

舉人歷任新安藍山知縣

節遜卷全集

呂誠源字以漸號東浯幼喜經書古文有名諸生閒父蚤喪事母以孝聞爲人坦夷無城府臨財不苟取予處家不爲煦沫態所交皆知名士浯多倭賊徒居金門所捐金數百築東堡以護近鄉逃寇者賴之沿海漁民藉其貲營生時有所餽卻不受晚年邑令數延大賓閒一赴卒後蔡獻臣爲之銘

節清白堂稿

劉夢龍字國禎號肖沂存德子幼機穎嚮學年十二爲諸生下帷發憤有聲庠序嘉

靖戊己間海賊橫發攻城夢龍手畫備禦之策邑令譚維鼎聽之又捐貲於城東築土堡爲犄角部署既定益市牛酒勸勞之民依堡得全者甚衆時父備兵潮陽檄調閩卒應募者未問貲第願得夢龍一諾蓋一日而集壯士數百人及父宦歸一切家政皆倚辦上承父志竭力洗腆無數見不鮮撫諸弟教而育之及父歿而禍作司寇洪朝選被逮死獄子伏闕訟冤謂令某與聞其事夢龍適與令善故波及之猶日夜負土襄葬事已析產甚均而挺身赴理紓諸弟之難弟夢騶竟株連褫青衿而幼弟夢松夢潮無恙卒以成立夢龍之力也及夢松既登第入仕籍乃退耕於野與田夫野老談桑麻鄉鄰構釁得其一言立解族屬有過舉正詞諭之無不改心易慮其達識敢言動中窾窾令人心折氣平晚年益遂於挫銳解紛之術善摧剛爲柔非獨其智多也年七十九卒

節清白
堂稿

劉紹彞本名應兌字悅甫號秋軒汝楠孫少聰敏父授以章句輒解悟性深湛嗜思先從邑解元林奇石學繼乃入郡師李光縉別庸去慮惟與二師橫縱今古不意滿不休入庠後愈蒸蒸思奮弱冠居父喪哀戚如禮附身與棺靡不周慎家政嚴肅內外無敢抗有犯面斥之事過輒忘人憚其威而服其量撫二弟延師課督不

以煢煢在疚稍為姑息又勇於為義周人之急顧體弱善病加以力學不輟竟無

年以終光緒為銘其墓

景壁集

柯揚字文蘊號方圃生逾月喪母又九月喪父族人利其遺貲厄危者屢賴祖母葉氏藏掖於壻家得免稍長善握算資用以饒待族人不追舊惡敦洽無間總功昆弟視若同胞慷慨好施慕尚賢豪長者如不及携子讀書郡城遂家焉曰吾故居得無虞海寇乎不數年而寇大作戚里避寇來郡者多依揚為棲止解衣推食無所吝咸稱其智且仁既而念莊江故居為先世拱木之遺身後仍將葬焉乃修葺宗祠命其庶子曰林居之長子曰森本名一蘭隆慶庚午年舉人任孝豐知縣

蔡鼎臣初名獻襄字禮謨號弼臺由諸生入大學性資英朗舉動儼飭喜恬淡不烜赫氣勢不徵逐貨利屢困於闈遂閉門潛玩凡古今文詞諸子雜書纂集抄評曰以此遺子孫吾可老矣素嚴取與而好施貧不能葬及匱乏者求無所靳以足疾卒年六十一

葉振揚字以東號寄南南陽人移居南安白石仍侍父南陽晝橫經夜侍寢二十年如一日父晚病困時刻不離滌器盥衣晝夜數十更兩載不懈弟萃陽來欲均勞

輒慰遣曰我讀而扶老汝耕而養老各致其能可也枕經籍史學期致用五不逢而志益壯性方鯁不喜俗流見高髻長袖豪少年急擯之獨與同志舊游迭過從其啟迪後生重實學不斤斤佔畢出其門者多博雅知名年未四十以弟萃陽之長子先章爲子未幾復夭以弟三子成章爲子每設帳必挈以從曰三世當不負

雒誦也成章萬曆壬子舉人已未進士自長洲令遷御史累贈父如其官後歷大理寺卿

節李鹿巢文集

林牧字師讓號葵洲幼能文而厄於遇孝養其親父素善宋姓每飯必延與俱父爲加七妹將嫁而難於奩具以妻奩充之父大喜二兄怡怡無間從兄以訟事繫旁郡捐貲解之嘗過族兄某見其啜茶數盃怪問故曰當午殮耳爲惻然捐餘糈餉焉又嘗見妊婦負薪亟走如廁意其產也告妻使婢視之果然爲具鷄酒食之婦得抱兒無恙歸尤折節諸名士與共有無簞人子待以舉火者爲折券每寄情於花竹魚鳥圖書詩酒間與知交酬酢勿絕家稍落不顧孫一柱萬歷庚戌進士官

御史

節清白堂稿

周仕慶號震吾治春秋明大義是非無所回護坦衷質貌無崖異谿刻之行孝友天

植父嗜酒不治產仕慶奉侍維謹務得其歡心父以酒患癯晝夜視湯藥恒口爲吮之歿則竭誠盡慎治喪如禮撫幼弟得母歡析箸時次弟所鬪田當下流慨然以己田易之卒付波臣無所悔仲父歿無子仲母僅存季父蚤夭二孤方孩提仕慶率諸弟事仲母如母爲季父二孤鈎券簿稽疆畝井然有條課子孫讀書必次第問其所業終日抱膝趺坐口不關長短心不着恩怨無親疏少長接之以禮桀驚者卽之輒化素雖不學醫然有所知叩之必應不計單寒鄉人德之年八十五

卒孫爾發萬歷庚戌進士應天府丞

節清白
堂疏

蘇商霖字德說號少泉宋魏公頌之後幼失怙奉祖父撫幼弟發憤其業弱冠爲諸生逡巡矩矱大義凜然讀書好觀大意生平極慕伍員諸葛亮謂二人所處極難耳又曰凡人立志宜高中夜嘗把古人好事思量一番心便軒豁如堯舜禪受何等氣象一以天下與人一以匹夫受天下更有何物掛碍胸中念到此便覺灑然素履儉約一裘十餘年絕不經意錙銖性孝友居祖父母父母喪哀毀幾絕諱日必號慟季弟訃自粵走數千里歸其櫬仲弟歿僅遺藐孫偶遘危疾涕泣籲天願以子代卒無恙持先世積行請督學入邑志郡守朱炳如爲紀世行大書之邑人

榮焉族祠燬倡首更新未竣工而歿年五十八孫國翰萬曆丙午舉人吉安同知

節清白
堂稿

林冕字道昭號靜軒牧子生而持重慧與年進父挈眷避流賊山中獨畱冕守舍露宿水餐中濕得瘧疾醫弗效築軒居之署曰靜終身無機事卮詞事父母無怠容友于仲弟翕耽無閒田產取礲确者僮指服物器用取贏敝者曰吾安而習也剛直好面折人過人知其無他皆諒之初有田十畝坐食漸耗家四壁立行一杖坐臥一榻榻爲穿無困苦意時掉臂獨吟聲出金石有侮者不與較年六十卒子一

柱萬歷庚戌進士歷官御史

節遜
菴稿

周國賓字慎德幼好學既壯能文名家子爭避席國賓益健戶揣摩遜志取友顧數奇不能博一衿爲人孝友沈靜內行醇備與人交篤而有終課授有師法負牆者沒齒佩服不衰里豪伉自恣者獨畏其知得其微言善然以解恥因人熱恥襲人潤蓋視利若浼者年四十五卒以子爾貴贈文林郎濬知縣爾發萬歷庚戌進士

歷官南京兆丞

節遜
菴全集

蔣懷忠字靖節號誨齋天性純篤值倭寇海濱扶父竄匿禾山父病亟倉卒無殯具

晝夜號哭哀感其鄰人潘為冒風濤越海購材佐殮喪母哀亦如之庶祖母無出
 婉曲承事得其歡心弟嗜酒夭歿遺孤三俱穉撫之如己子而其二同日溺海又
 撫其孤之孤粒粟寸布計入均賦嘗以悻直為不逞齟齬繫於犴狴手尚書一編
 諷誦弗輟未幾繫解而慷慨尚義不少衰及子登第命建祖祠葺先塋值災祲告
 糴於廣以贍族婚喪不能舉者助之又推其餘以逮里人郡邑重其德行請為鄉

飲正賓子芳鏞

河干集

蘇思義字文所幼讀書就童試未冠喪父事母篤孝愛二妹為捐產治裝及字為諸
 生乃輟舉子業專務為詩與名公結社倡和陶然自適家近市時出坐肆間閱熙
 穰來往人盡愛敬即有侮者遜謝不與較邑令延鄉賓辭不就年八十六卒

節清白堂

稿府志
列篤行

吳達一字本愚號仁齋西安令德范孫六歲而孤出撫父柩入戀母側哭泣拜稽一
 如成人弔者奇之自是母子熒熒相依母躬訓課之坐立句讀一一稟承不敢少
 踰以嬉既除服聘林希元孫女希元置之塾周旋舉止不失尺寸時與共讀較鈍
 敏弱冠成婚學日勤日益五應試不遇始謝儒業內行純篤事母婉愉或遇盛怒

多方勸解至鬚髮斑白猶時向牀前長跪忍飢耐寒盤餐之費日可一錢至祖父諱晨則不吝市醲擊鮮生平讀書課子杜門處悖無凌厲之氣矜飭之詞媿衣美食之奉學博將舉大賓遜謝未遑年六十九卒

節清白堂稿
府志列篤行

郭榜字廷聘號穎台爲諸生淹貫六籍而嫻於禮容周折曲中尤精於易爲諸生祭酒性真愷不問家人產產益落一蔬一褐淡如也及子貴乃謝諸生受封然猶着布素從一奚奴無少長折節下之見里中蒼頭兒則喜而摩其頂邑令延爲鄉飲大賓辭不獲而後應子夢得嘉靖壬戌進士瓊州知府姪日烜萬曆己丑進士嘉

靖知州

節清白
堂稿

蘇震亨字君仁以字行一字君鼎號新郭生有穎質九歲能文弱冠以儒科第二人應省闈自是聯占高等名大課試屢躋而閉戶下帷不少挫業亦愈工性豁達不問家人產遇物坦夷無疾言遽色居家孝友父歿析箸二弟以居長指繁多分之震亨念仲弟天絕父命輪祀恐其久而湮也乃以次子爲仲弟後而剖己之分業授之二弟議更析曰無庸也吾所受已多第令死者不替足矣何累弟爲家居苦小偷嘗一白之捕有禁囚認識所剗窗門手列數盜以報震亨叱曰老牢頭將毋

藉以快讐覓利乎遂已之及子游泮乃罷諸生嘆曰科第命也吾不偶無恨獨恨負諸名公知己耳居恆以名文法帖自娛尤善古文詞詩賦歌行各窮其致書法出入顏蘇求者屢滿邑令洪世俊嘗請額五門南朱紫東鴻漸北拱秀西豐澤朝元手澤猶新年六十卒子國翰萬歷丙午舉人任浦江令陞吉安同知以浦江任內報最贈父如其官

節清白堂稿

池浴沂字士潔號三洲為諸生試輒高等既游國學有聲故事上舍歷滿授簿丞及州郡倅浴沂不屑就而歸延師教子性爽塏不逐錐刀時與友引觴唱和以是非曲直質者片言立解親屬來謁必詢其甘苦或周其不給無少吝嗇租稅之入或後時或乞免亦曲體量給之年近九十精神愈健邑令延鄉賓不赴乃顏其堂曰

熙朝人瑞卒年九十三子顯袞癸卯舉人官同知

節清白堂稿 巖集合參

王三聘字允覺號莘野三接弟生而丰神英拔弱冠為諸生嘗與蘇濬相切劘學益進事親至孝遭二喪哀毀幾不欲生倭亂後兄寄櫬劉營數奔護無所避功叔溺死為負屍視其含殮嘗省試至橫路遇漂屍捐貲瘞之其陰所折券周人之急不可勝數督學豐城徐公行學官舉優行邑博吳炳思以三聘應時慶得人年五十

八卒姪道顯萬歷癸未進士湖廣按察使節清白

堂稿

陳廷佐字時守號仰台陽翟人爲諸生試皆高等惟不利益下帷攻苦篝燈丙夜雖盛暑隆冬不輟於文好史遷賈傳於詩好杜尤精易學合蔡陳林諸講義參伍融洽竅其奧窈間以意發所未發蔣芳鏞陳如松李雍皆執經焉課子維嚴寢食不廢及子基虞成進士乃謝罷諸生就封南雄府推官晉封南大理事評事中憲大夫順德知府邑令九延大賓閒一再赴其感觸時事多發之於詩與知友結社探韻積成卷帙性質直坦夷絕無睚眦處父母兄弟有至性嘗就外館忽心動渡海歸值父歿護侍含殮人謂純孝之報其居母喪年已及耆猶苦塊哀毀如父喪二弟早卒經理其後事復撫其孤族子弟秀者獎掖之弱者扶植之心存濟物捐貲修造便步橋歲掩骼施榘以數十計疾疫盛行爲藥以食餓者平居乏聲色之好衣取布素器用剝敝無雜賓無幹僕青編相對一榻蕭然篤學恬修君子也年七十有七卒

節清白
堂稿

蔡祚字元貴號寄南父廢疾祚鬻蔬菓爲生竭致甘旨浣滌扶掖不稍離里中有大繇役皆祚任之得其資無自肥以施人邑有寇警携子女匿山谷中分餉與同匿

兒相顧恤既稍羸結客餉師無虛日鄉鄰有忿爭及爲胥吏所苦輒致至家杯酒
解釋之儒術方伎匠作至鄉無不接款種秫爲酒畜雞豚種蔬果預購海錯祭祀
賓客應之裕如鄉染疫其妻亦病昏暮見羣厲擁入求福有角巾白衣從後呼曰
誤矣此善人家宜亟去於是羣厲皆去如煙縷穿屋上走如裂帛聲其訓子鍾有
曰世間惟下人最不可爲何爲下人無廉恥者是若無所表見乃村人耳又曰吾
觀爲官者官已官耳未有官民官者夫以一人受億萬人之敬奉而不能爲民造
福斯已矣又殃而禍之寧得爲有人心乎又曰子孫能讀書則爲士否則農耳慎
無爲胥吏胥吏者絕人與天者也又曰出債之家權子母計奇贏惟日不足人且
睨其後終必貧窮以故鍾有令興國遷分水直心古道復能其官皆祚之教云

參景

壁集

李霖慰字于周號東濂爲諸生授徒養親規行矩步不失尺寸讀書一守紫陽傳註
爲文以發揮理趣爲工及門多貴顯其貧者不責脰脯也季終上束金於父聽其
分與毫不自私與人交吐露肝膽不談人過人亦不忍欺之性恬淡不言勢利邑
令高其行誼嘗以兩造就質固讓而徐以理論遣之終不令費一錢有故人宦游

千里外致書招之竟不赴事父母孝待弟友處宗黨能周給生平無嫚容遽色謙下濡忍人稱長者子獻可萬曆癸未進士戶部給事中

節清白堂
稿參舊志

黃蘭芳字時薰號馨齋坂漢人少爲蘇紫溪濬所器顧不甚喜帖括年二十五父弟繼歿撫孤姪持門荼苦乃釋儒業課次子於襁褓中人咸迂之既而母妻長子俱歿產益落多外侮鍵戶授經忍睡安之及子登第次子孤姪相繼爲諸生益淡泊自持絕聲色靡麗戢子弟僮僕無預外事邑長禮請賓筵僅一赴天性孝友不競錐刀父嘗貸息於龍關遺券百餘金悉折其券海塘有魚蜺之利族人衣食其中強隣欲奪之十數載不決族益窘祀田稱貸莫應質私田充之迨事白而族苦懸糧多棄室他徙爲就祭塘中經紀其戔入祀事克修餘以佐芻輓及書香筆硯資泊阜罔市禁子弟毋得爲有族籍名索舟人束薪爲給直而詰責族子黠少年修郟恣掠海塘苗蛤適子報登第置不問與人披肝膽事有糾紛得其一言立解喜物色知名士多奇中及其人貴顯卽不復通一刺子每奉使必問途所經止與游何人節郵却饋幾何輒色喜祖姑適謝未婚而烈族叔母陳以純節着祀之家廟著爲譜外祖父母弗嗣置田宅令其族爲主祀祖姑及姑蚤喪家不能自存爲周

恤之他戚屬賴以舉火者非一家海氛初熾携家避山谷間賊相戒無犯己已撫局再變鳩集勇敢出奇抵禦四鄉賴以免患年八十卒子仲曄改名其晟天啟壬戌進士授中書曆官御史出爲桂林知府擢南寧道在中書御史任內兩封父如

其官

節敬
日草

張賁垣字擎座號吉園副使朝綱三子也爲諸生事母盡孝獨供甘旨不以累兄母病廢寢食躬湯藥禱以身代歿盡哀盡禮父赴任廣西便道過里賁垣念萬里瘴鄉不宜聽父獨往遂從入粵旣而父歿於官得親含殮持喪歸賁垣先自購地於朋山之麓至是爲父擇吉形家拘房分之說不得合賁垣以自購地示諸昆交善之遂襄父葬事爲人恂幅無華絕去機械至是非一定不能阿意以徇人讀書教

子而外不干餘事郡有名士必折節致之與其子相切劘焉

節恥躬
堂文集

莊獻字際範嘉靖丙午舉人篤學多識爲人敦良質實温恭有禮居鄉處人和樂無忤其在朋輩雖一日之長亦謙謙隨行不敢先遭歲荒窮乏稱貸無所吝亦不甚

責其息鄉人愛之

節林次
崖文集

洪居正字季中號柏坡萬歷癸酉歲貢授武進訓導捐俸以修學宮卻贄以卹寒士

被物色者多脫穎去及子邦光登戊辰進士出守雲南謝官就封尋晉封貴州左參政有司屢延大賓閒一赴之居正負奇力學文譽蜚騰歷試多首拔負篋者屢滿戶外亦多翔貴性友愛撫諸姪有恩其訓家云孝弟禮義文章節槩當吾家茶飯諸兒曹喫得飽時卽是便宜田地自壯至老言無過詞動無踰則不作氣勢不廣生殖年八十四卒

節清白
堂稿

蔡紹英字雋卿號少桂六歲而孤二母育而教之幼有至性出入起居惟命是從讀書務通大義不作書生呻吟態爲人重厚質直無窈言無飾行處昆季友恭女兒奩送來往無二視見尊長一話一動恂恂無敢先人待里隣然諾必信升斗不靳無侮者無欺人人亦無欺者里黨難平之事解忿息爭不之官而取決其一言年四十六卒堂叔獻臣銘其墓

節清白
堂稿

王高立名賢繼以字行名諸生積學勵行族中多貧窶邑徵糧急高立自出金代之輸縣令高其義表其堂曰義方後以次子覲服官封徵仕郎年八十六卒所著有毛詩小傳十六卷

王覲字正朝別號蓋吾爲山東寧海州通判山東故多旱蝗歲饑則民相食覲曰此

皆長吏無救荒之法耳因建義倉自斥千金爲之豐則積荒給於民二十四縣效焉民感其澤立祠肖像事之以廉能陞福府審理歸著家訓令子孫必同居後嗣遵守其訓至五世不衰島上稱義門

鄭師字廷肅號東石溪邊人爲人仁厚好施值年荒每糴米賑濟所全活甚多遇骷體輒埋葬之臨終時自知死期凡親友所貸契卷悉焚之或還其人及卒北鄰皆爲持齋以資其冥福後人因號所居之處爲菜媽街孫潤中累官至大同府知府阮伯宗字一峯幼孤母守志鞠之十餘歲泛海求贏餘以養母母歿躬負土石與父合葬鷺門課子讀書風雨寒暑不少輟生平寡言笑絕交游取與不苟值峽江曾公櫻之喪患難中傾囊助之一裘三十年一履五年終身不衣帛有隆萬儉樸遺風子旻錫

阮旻錫字疇生父伯宗字一峰世襲千戶裔世居海上幼孤泛海學賈以養母母沒躬負土石與父合葬鷺門甲申國變旻錫方弱冠慨然謝舉子業師事曾櫻傳性理學患難與共又得友曹石倉之友楊能元池直夫聞其緒論講習風雅旁及道藏釋典諸子百家兵法戰陣醫卜方技之書靡不淹貫出覽名山大川北抵京華

託處十餘載後乃逃於釋氏名超全以教授生徒自給實鄭所南謝皋羽之流著

有夕陽寮詩集詩論行世林佶謂其詩冲微淡遠一以正始為宗年八十餘卒

雁水林吉人序略孫靜庵明遺民錄
通志列文苑舊志列清之隱逸未合

葉啟蕤字景芝吏部主事翼雲姪也幼聰穎力學隆武丙戌與臺灣張金棕劉顯襄

同領鄉薦攝漳州通判閩亡從翼雲倡義同安城破遁跡蓮村十六載居恆鬱鬱

以書史自娛語國家事輒嗚嗚哭不止康熙癸卯鄭氏亡啟蕤賫志以沒年五十

七 參家傳廈門
志明遺民錄

葉迎字允受結髮從戎以勇略累擢總兵都督鼎革後杜門不出春一笠秋一綸徇

徉海上以終 參家乘廈門
志明遺民錄

紀文疇字南書一字元昉後廩人年少為諸生有上下千古之識興泉道王猷館之

署焚香讀易口不及官府事與子許國從黃道周於鄴山隆武時道周薦其博學

多才授中書舍人擢翰林院待詔纂聖安實錄閩潰挈家渡河從鄭成功復同安

城陷以勞瘁死所著史勺三卷道周謂其論賅古昔上下三千年疑難反正盡之

矣華亭徐孚遠序其涓龍詩文集以黃紀比歐蘇以許國兄弟比文忠文定時人

謂不愧云 參廈門志遺民錄林霍續閩書眉龍堂集序

紀許國字石青文疇長子年十六為諸生從父聽講鄴山弟子二百餘人許國最少

黃道周許以掉臂獨行贈之詩曰蒼蒼千古留石青不與世界爭零星著有丁史

焦書名山集拂塵集數卷崇禎壬午舉於鄉為臨川揭重熙所得士與同榜林說

林尊賢有三異人目著有同岑草一帙北都變有望燕吟一卷復從父舉義避地

廈門四明沈宸荃薦於魯監國授禮科給事中不就廣平路振飛薦於永歷帝以

道阻不果行鄭成功欲致之幕府亦不就與諸遺老脫粟烹薯芋相對歔歔為詩

文以傳之所著吾浩堂詩文集同里林霍為之序 縣志廈門志續閩書異人集明遺民錄合參

紀保國字安卿文疇季子幼隨父兄避居廈門及長日取父兄所著遺書閉戶編輯

落髮披緇攜一瓢出游五嶽林霍為序以送其行並序其詩詩尤清雋絕俗飄飄

如其人 續閩書明遺民錄

莊潛字伏之紀文疇弟子與紀許國林霍善相與扁舟攜詩登虎巖入吳庄放歌月

下獨攄孤憤進士沈佺期雅推重之潛意欲纂述舊聞以耳目覩記不及徧覽中

州事跡偶得遺聞數卷遂編纂宏光逸事繼以詩歌名為石函錄紀許國為之序

異人集石青尺牘
志明遺民錄合參 厦

林霍字子濩號滄涓橄欖樹人生明季食貧讀書博洽能文好結交當世名人以氣節自期許詩文著述甚多尤究心聲韻之學問詩於盧若騰徐孚遠姚翼明亦推爲秀出紀許國序其所著詩謂如空山發翠馨香不絕別留神韻於筆墨之外自丙戌秋往來虎溪鶴嶺間與紀許國稱莫逆交欲師事之許國曰某不敢擁皋比如黃魯直之於子瞻少游足矣相期許如此稱遺民終身所著續閩書皆鼎革時海內名流不肯失節者又著有雙聲譜鵬亭詩草滄涓文集滄涓詩話荷樓詩選

舊志厦門志紀氏藏稿明遺民錄童蒙求林子濩紀略合纂

陳則賡號錫墀郡諸生長史則采弟聰敏多智泰昌庚申紅夷窺中左所則賡以計靖之天啟二年壬戌復至總兵徐一鳴率師來厦則賡贊畫軍門謂夷性反覆宜剿撫並用乃詭詞議撫尅日出家貲募敢死士椎牛酒置毒入夷舟遍觴之且曰今日互市成中外胥福盍姑盡醉夷喜飲則賡急下小艇趨舟師挾所製油蓑直撲其艦乘風縱火夷衆殲焉臺省交章論薦敘功第一予官不受並不赴舉闈豪放山水間以老孫國倫康熙三十五年丙子舉人

府縣志陳家譜增纂

林志遠字致子號陶菴大梁孫萬曆戊午年二十六舉於鄉力學博聞勵志弗衰九
上公車崇禎癸未始成進士授工部主事假歸甲申後奉母結茅清谿仙峰嶺不
復出人稱陶菴先生年七十二卒著有歷代史白舊志

楊期演字則龍號克齋博涉書史尤工古文崇禎三年庚午舉人甲申後與父廩生
師瑄杜門不出讀書安平山寺唐王召爲兵部主事及唐王出延平期演追赴不
及辛丑以後僧帽道披晦迹後溪村日惟垂簾閉戶校讐經史爨火屢空泊如也
每歲遇春秋佳日陟山巔北望酌酒遙拜繼以痛哭聞者憐之卒年七十餘著有

易經管見島上紀事子秉機元孫宗潮俱庠生

舊志參家譜

楊秉機字允中崇禎邑諸生期演子國變削髮爲僧自號鷺島遯人北抵金陵上京
師蒼茫弔古若不勝情乘興游岱嶽意趣甚豪思欲窮覽寰中形勝以行路旣艱
屢變姓名間關賦歸深自韜晦胸旣積有磊塊感事懷人一寄於詩天津西望云
海氣連孤塔波先壓古城舟泛浙江云雲收千章立水漲萬山高卽事云馬蹄遲
積雪木末接遙天憶游云銀河倒瀉乾坤小滄海騰浮日月慵渡揚子江云北固
斜連平樹浸金山中立信潮分抵儼石云倒攜如意歌新曲每著征衫語舊知廿

八都云茅店更新留晚酌野橋依舊送歸蹠又有笑人爲氣候認我是江山之句

寄意遙遠所著有浩然小草

集本

林嘉采字景則應翔次子崇禎十五年壬午順天舉人留心理學國變後韜晦嘗謂其甥鄭得瀟曰士貴立品與聖賢俎豆相映對尋常青紫不足艷也其高潔如此

廈門志

葉后詔中左所人爲諸生屢試冠軍崇禎甲申應歲貢京師陷未廷試而歸以詩酒

自娛與徐闇公鄭牧仲輩爲方外七友後渡臺著鷓草五經講義行世

府縣志海紀

李樹官字石臣偕阮旻錫築館於城南廢圃屏絕人事取先儒傳注語錄與有明二百餘年紀載及先輩評訂者沈酣浸漬數年業大就博極羣書尤工古文詞素慷慨負奇節獄獄不可下諸貴介頗願納交皆叱而遠之以故布衣蔬食終其身困厄年四十有四而歿

舊志

清

王士豫字立先積善白礁人當海氛播遷時盜賊充斥士豫鳩其宗族僑居浦頭鄉出已貲築二土堡據高崗爲犄角勢日練鄉勇紀配整肅寇莫敢犯衆賴以安年

六十舉賓筵子象雍正壬子舉人孫聯魁拔貢生

陳雲初在坊里東門外保東橋人生平仗義好善樂施順治戊子年鄭成功陷同安雲初不惜傾貲收髑瘡體置封樹焉時邑宰鄧麟采表其閭舉爲鄉飲賓卒年六十有六

王良字遂侯號毅菴居晉江隨征臺灣功加左都督職銜值邑令清復銅魚古蹟計費浩繁良慨然任之又施樁於縣城建朱文公祠於其鄉子天慶貢生知縣觀濤康熙辛丑武進士斌康熙辛卯武舉人任海壇守備乾隆元年以長子天慶貴贈如其官

陳維衡字季璇永華三子年二十爲諸生有學行漳石美有祖屋舊址附近黃姓貪其地謀於衡曰君祖屋廢不用宗人皆碌碌請爲君求之私奉三百金不然將強築此地以千金爲訟費此地終非君家有也衡拂然曰若然則祖地席捲而去宗人皆碌碌某遂得爲錚錚乎遂白於官越年兄夢球以翰林奉勅巡海有司審實將按黃罪衡復請曰某於黃爲同鄉只求斷歸原主不願推究其罪既出諸從子皆憤以叔爲癡衡曰是非汝所知也盛衰有時今日何難盡法後日可長保耶是

時黃自分禍且不測竟得免感激難名踵門叩謝自是相敬愛數十年莫敢窺伺
維衡居家端重終日無疾言遽色宗族親友皆雅重之

節家傳

陳孝宗字長美一字兆宏先居海澄青浦以海氛避地徙廈門遂爲同安人孝宗弱
冠失怙習計然術行己以忠實爲本不苟然諾鄉里交相信重外島遠夷聞其名
以貨來者爭投託焉自是貲漸進事母盡孝五十而慕青浦祠燬於寇倡族重修
春秋致祭幼寄養謝從龍家從龍客死永春躬往訪求其遺魄歸葬以時祀之母
舅無子爲擇承祧資其婚娶以至成立青浦族人往來無虛日款接不倦與人交
有始終周人之急無吝遠近稱爲長者有司察其行誼延爲鄉賓年五十九卒

節近

道齋文集

吳曾芳字孫若號愧菴由邑諸生領康熙丙午鄉薦庚戌成進士爲文翻經談理隳
括合度聲華爛如性至孝出於自然父母稱之無異詞侍親怡聲下色父少恙則
魂寐不安三餐茹歡偶失調度則憂形於色晴陰愉拂拊摩慰藉務使體適而心
懽胸無宿物喜慍隨觸過而輒忘與人交見肺腑代謀必忠隱惡揚善聲色睚眦
皆理遣不圖報坦夷無崖岸而不爲破節事姿識通朗善察情僞曉事機而能持

大體不為錙銖小點卒於京同年李光地為其行狀節王榕村集

王朝俊南澳遊擊康熙庚申邑大饑俊買米入百石煮粥分濟仍每日人給米一升

全活甚衆

蘇未觀積善里人康熙庚申往永春販布是夏穀貴斗米一金未觀將資本盡數散

賑又施櫛百具以殮餓殍永春載之邑志廈門新路渡頭壞捐貲修葺又倡修深

青橋行人便之

劉彭齡霖任子為諸生有文名勇於為義樂善不倦事父母得其歡心以一經教子

子運昇康熙庚申補科舉人平和教諭

陳御飛字克龍諸生陽翟人嘗捐田以通水利立石以表孝節施棺木修橋梁康熙

二年浯島播遷周給族戚鄉閭義之

金友原姓張同安人康熙庚申補戊午科舉人授仙遊教諭告養歸足不履公庭訥

言敦行士林重之錄府志補

陳王春字伯元由監生捐州同職銜孝親睦族建祖祠置祀業尙義好施助設育嬰

堂倡建縣堂重造南門橋塔塘橋又自造積善里英溪寧濟後埭三橋行人利賴

督撫學使郡邑長各給匾獎焉卒年八十五

陳錫英陽翟人摯於天性有女兒已適夫遭家板蕩徙居郡城父母憂之錫英時饋遺於百數十里外徒步往返未嘗諉勞後并挈其家以歸數年頓復其舊業再從兄嫂王氏四世俱單氏孀居苦節所撫孤二貧不能生思鬻少者以養長者錫英憐之割以膏腴田付之耕不納其租併代輸糧以全其子母族里稱歎比之范公義田云

林芳德捐職州司馬嘗捐百金修梵天文公書院倡改嶽口理學名宦石坊施棺十年費以千計所居馬家巷有通利廟爲朱子簿同時所題芳德重新之復於其後倡建祠閣以祀朱子計費五百餘金邑令張荃立牌記之

周廷樑事親克供子職撫弟姪友愛無閒祖祠傾頽獨力修建族姪貧乏者加意存卹鄰里喪葬極力扶助遇歉歲寬田丁租入貧者卽爲破券橋路廟宇隨力捐修雍正十年舉應鄉賓乾隆二十二年以子岐德遵例急公贈中憲大夫

黃錫時字奕中號砥園積善里錦宅人明大義以家貧棄舉子業爲貨殖計漸饒性寬和樂施予慕范文正義田遺規捐千金置產宗祠以資族之讀書孤寡無所賴

者其族人黃濤方建華圃書院錫時念院中膏火不敷先後共捐七百餘金以資生息爲經久計而土木之興實董其役寒暑不輟者三年工竣積瘁而卒年六十九以遵例急公請旌焉

呂文遇字雲友號樸齋東門外人植品端方弟失怙恃撫養成人及弟歿視遺孤如己出其於宗族親朋尤能解囊周卹人以是義之

李擎輝字角英號瓊齋由國學生捐職州司馬積善里金墩人幼失怙恃事母與二兄內外無間言以勤儉振其家親屬有夭折者輒分貲財畀其婦使得全節嘗與魏彝玉交財彝玉遺算二千金逝後查晰人無知者輝卽還其婦人皆義之邑人創建華圃書院輝捐金助成之又以院中膏火不敷復捐金以生息置產爲延師育材計合前後共捐八百金其有功於書院者甚大昌平宮詹陳浩作傳稱之

陳夢熊字士希號松軒貢生在坊里溪邊人胞姪寧世四歲而孤時已析箸夢熊體父母志推食解衣視同己子復爲延師督課越甲子寧世登賢書族人以是多其德焉又性慷慨勇於爲善 文廟前庭蕪廢樞星門壞皆捐金修葺又修嶽口大路至義娘廟前修營後鄉及蔡宅小橋行人便之眞君廟龍虎宮亦俱踵事增華

乾隆丁卯年鄉大疫施棺一年貧民之不能殮者得免暴露邑中以高義稱之
陳秉義在坊人捐職同知幼喪母事繼母盧氏克盡孝道能得其歡心及父歿侍奉
其祖起居飲食惟謹家三世同居合指數百祖以秉義能諸事悉委其經理井然
有條嘗擇地西郊外建支祠以安先靈又捐貲修建書室多蓄經籍廣置書田延
名師以教督弟姪如洪簡祖武捷春邁倫光桓等游黌序登賢書者數人皆其力
也有叔氏時涵年相上下事之不異於父凡事必稟命而行與堂弟亦怡怡終日
誼若同胞宗族戚里或有不浹者得其一言立解蓋由其孝友誠懇素孚於人也
以壽終安溪太史官獻瑤南安太史洪世澤皆爲之傳

陳邦寶字璞卿捐職布政司理問少躬耕養親門內藹如旋客浙江甬東值歲荒民
艱衣食邦寶製綿衣分給復於通衢煮粥賑饑當事令邦寶倡捐兼董賑事遂首
捐重貲作倡並分頭勸諭捐賑凡向義捐輸者大書其名於公所壁上註明捐數
若干人競感動樂輸全活者甚衆後乾隆庚午甬復大歉時邦寶已歸里矣寧台
紹范觀察訪其遺法踵行之民困以蘇郵贈匾積厚流光旌之居鄉施與無吝族
戚多藉周卹當事建玉屏書院置育嬰堂皆捐輸倡首雅有樂善好施之風

陳思敬字太初副貢生乾隆癸酉重修貢院思敬樂捐三千金又建寨仔山義塋倡
修文公書院遠近咸稱高義子鳴珮廩貢生龍溪訓導

王瓊林字玉崙號輝山靖山頭人嘉慶二十三年舉人教授鄉里多成名者巖靜而
和辭受取與間斬斬不苟豪富家非其親故十邀不獲一面非公事不涉足有司

之庭生平不狎毀人人亦無毀狎之者卒年五十二

呂世宜撰傳

高育茂字植萬號樂園職監性淳樸好施與雍正癸丑洪水爲災流屍遍野育茂施
棺殮埋鄰里窮乏稱貸不吝建宗祠修譜系從姪華松少穎異育茂器之視同己
子延師課督後由千總挑入侍衛補崖州營參將陞春江副將署理總兵族人咸
爲育茂之力也嘗謂其子以彰曰凡有義舉量力助成以彰凜遵遺訓乾隆癸卯
捐建奎星樓癸丑倡修崇聖祠朱子祠乙卯建輪山紫陽書院嘉慶丙辰改朝元
城門清銅魚古蹟以彰又命次子邑諸生有繼倡修文廟明倫堂協輯邑志命三
子國學生玉成修城垣浚河溝義聲著於四方督憲魁公嘉其義賞以彰袍褂銀
牌邑令吳堂爲立傳并建坊旌之四世同居食指六百餘不畜婢僕世咸稱焉子
孫蕃衍多入雍庠

童重器字廟華號榕亭捐職州司馬在坊里月眉池人平生樂善好施外祖父卒於臺灣重器體母志渡洋護櫬歸葬又城東回祿近地獅嘴口積樞延燒骨殖支離施棺殮埋鄉鄰貧乏賙貸罔吝姪婦葉氏青年孀守重器加意撫慰以成其節年六十八卒子浚德乾隆戊申舉人孫開勳庠生

陳廷振字敦遠國學生六歲方在塾聞大父歿擗踊而歸哀毀如成人父母昆弟間未嘗有拂意乾隆五十二年涪州饑載米卹其族人明年疫施樸五百具子榮瑞號雪舫以廩生爲龍溪訓導道光元年舉孝廉方正

廈門志

顏丹書字蜈蚣號敬銘在坊縣後人少孤家貧事母至孝以勤學鼓篋蜚聲巽序兄弟友愛甚篤相與經營商業家道日隆同治初由軍功保舉訓導歷任歸化永福儒學歲科兩試概不受費每月集諸生校藝勸勉備至士望翕然及賦閑喬梓竹林一堂濟濟延師教督多所成就性慷慨好施戚友告貸無力償還者輒焚其券子籛南姪俊皆入泮

張添字怡和世居澗井鄉少貧家無屯積兄弟五人添居三竭力農事頗有餘裕及添壯復業商四十年後家計小康五十餘歲而九男三女性好施親族中有求助

者不少各持家勤儉有法子姪輩同居盈百無閒言至敦宗睦族排難解紛靡不
勉力爲之享壽八十四歲卒之日子孫執紼者計百廿餘人

許希仁
訪稿

葉時泰字錫爵蓮坂人七歲失恃父客異域廿五年絕音耗庶母黃太恭人鞠養之
束髮就傳慧敏敏學性至孝偵父所在間關迎歸晨昏温清滫瀡旨甘之供必誠
必潔自以非庶母無以成立所以事之者尤謹居喪哀毀無節慟不欲生年雖耄
遇朔望必展親墓徘徊悲涕累日不忍去鄉人恒樂道之以爲子弟勸生平勇於
義事戊申大水雙涵長堤坍塌數百畝桑田幾變滄海時泰催役急攜畚鍤運土
石剋期完善民賴以粒嗣又修祖廟造塔於雲頂巖解嘉禾山械鬪凡所經畫井
然秩然咸豐癸丑厦門會匪構難攻掠城邑時泰時率團勇爲官軍援擊賊於金
榜山破之事平獎加五品銜賦閑家居年躋大耋精神朗朗如壯歲蒔名卉養佳
禽翛然有塵外想以子貴封奉政大夫翰林院編修加四級卒年九十五子有年
邑廩生大韶候選同知四品銜大年光緒戊子舉優行第一旋捷鄉會官編修

節

蔡仁撰
墓志

陳澆字超然號謙敏溪邊人襁褓失怙四壁蕭條性至孝作小負販以供母及壯游

廈門司馬鄭雲襄奇其才派司茶稅局會計以廉能稱旋辭局務服茶賈推廣南洋商業遂以懋遷起家生平尊師重傅喜與學士文人相來往以此多慷慨好義事咸豐初年會匪滋擾滄聯絡鄉社扼險守禦一方賴之以安鑿井風俗樂戰鬪動以火器斃人每捐貲調停爲其息事邑天花痘盛行嬰兒多殤滄倡款設牛痘局於西亭風行一時孩提賴以全活者頗衆山東災屢捐賑恤奏獎五品同知銜及樂善好施匾額其好善有如此者壽六十有二卒子瑋舉孝廉方正孫永思邑

庠生

摘傅炳鎧墓志

曾鑄字少卿城內北鎮宮人祖式欣移家滬上遂居焉鑄讀書能明大義十一歲誦毛詩至衛風問師曰戴公文公復國中興應入太廟不識於公之父母將安置之師奇之而不能答嗣以寇難棄讀就賈居恆服膺寧陵呂氏故其操守行誼多與之合間復作畫涉筆成趣菰蘆秋雁栩栩欲生性慷慨好施親友之待以舉火者恆數十家賑濟鄰省捐助善舉無不慨發囊金光緒十八年山東等省有災疊次助賑該省巡撫爲彙案詳請獎給藍翎鹽運司銜又於安徽晉邊助賑獎換花翎二十三年江蘇淮徐等處以水災助賑兩江總督會同江蘇巡撫詳請獎給二品

封典二十五年建義莊宗祠學塾於太倉州嘉定縣江蘇巡撫鹿傳霖据州縣布政使司之請按例奏給樂善好施旌表建坊其題本有云師希文瞻族之規效周禮睦嫻之訓觀其慷慨好義洵足矜式里閭等語再數年美洲人虐待華僑在上海首倡抵制美貨不與交商登高一呼萬山皆應美人請中政府欲加害之鑄提倡益力其見義勇爲不避艱險有如此者後每因交涉失敗我國人皆能以抵制爲政府後盾鑄之力也鑄卒於滬上子澤霖上海縣諸生

上海志
稿合參

論曰我國爲世界最大商場無論何國皆欲於條約上爭佔勢力以爲通商利益計交涉之失敗由來已久而我國人卒能一心抵制以團結力爲立國之精神非鑄倡始之功不及此

蘇國鑄字梅卿號月船幼聰穎勵志讀書不預外事年二十入泮益規行矩步言笑不苟光緒己亥年戴學憲按臨科試拔第一其弟萬靈第二均有聲譽序國鑄性孝友父母昆弟有疾必晨昏侍側無稍離生平與邑諸生余玉書許玉山李春臺林玉堂最友善醇厚謹飭之士也以此鄉閭每推重之光緒末季地方多盜被公推爲團練總董恆以才不勝任勉勉勤勤里閭安肅丁內艱慟哭幾不欲生旋

得病輾轉牀席者月餘以先人窀穸未安心常警惕冒暑游山擇地疾作不勝喪

而卒年四十有三

蘇家乘
倪炯采

胡鉉字鼎三訓導友梅子銅魚館人未弱冠卽能書尺餘大字有四方之志遂游上海天津北京廣東及江浙年二十餘適值友梅商賈失利挾貲七白金赴香港不數年堆黃積白遂成鉅富性至孝友梅官福州每歲必省親數次恆以不得長依膝下爲憾事無鉅細必請於父母而後行所入貲必均諸弟無少吝舉凡睦內族篤外姻力所能爲悉致之親屬中有可造就者輒極意扶持俾克成立邑濱海有水旱輒請堂上平糶賑給悍鄉械鬪死傷人命數十甚奇慘多年不能解甫聞知卽躬出調停解囊賠資以息其禍辛亥光復盜賊充斥溪船苦之乃請於官出已財設義勇隊緣溪梭巡晝夜保護行旅以安梵天寺毀爲捐貲修之牛疫作慮傳染爲買而沈諸海慮婦科穩婆接生未周爲設女醫局以調劑產婦義聲所至遠近同稱著有椽筆樓初集二卷以民國丁巳卒年五十一

參柯榮試
撰墓志

顏文禡仁德里港頭鄉人僑商南洋迨三十餘歲回梓采風見其鄉無識字者心焉憫之於是倡設私塾所需經費禡自籌畫鄉設煙賭又竭力勸除祠宇有損壞者

僱工修築族中有貧而無賴者禡按月幫助自奉甚薄未三年突聞其父在南洋病篤禡即買舟速赴侍奉湯藥晝夜在側未嘗廢離父歿即親運父柩回梓安葬年五十六卒

同安縣志卷之三十三

孝友錄

書君陳篇以孝友為克施有政見家庭之內起化之原也父父子子兄弟弟而家道正正家而天下定見孝友為天地之經治家治國治天下不外此也夫何新學繁興倫常廢墜言厖道雜不辨人禽遷流所極伊於胡底嗚呼痛矣邑自紫陽講學聖道以明地義天經民實則之其服習詩書者固彝倫攸斁即下至野老耕夫其於父子兄弟間得天倫之樂事者亦所在而有此義立而後後之越綱常名教之大防者知所愧是不可以無志志孝友

唐 郭 鎔

宋 許 山 蔡挺卿

元 顏應祐 沈 祥

明 吳德范 張鳳徵 顏 宏 顏敦祥 蔡秀鍾

張宏綱 樓明鳳 王肇禎 胡 旦 劉震春

蔡憲曾 蘇存明 蘇 寵 黃俞叔

清 辛肇姬 林化衷 陳祈猷 陳淑選 卓 隆

王 生 王家獎 王贊槐 許 開 方惟正

陳獎芳 吳際斯 陳瑞映 林德馨 黃錫明

林起鳳 周特生 王三樂 劉夢煜 劉逢升

吳 惇 周為彩 梁以鍾 黃 傳 高奇聰

杜梅健 楊兼忠 池泉聲 陳元珩 呂仲誥

呂福星 陳宗超 林 帶 邱樹功 薛師儀

辛萬里 陳蓬瀛

唐

郭鎔汾陽王六子駙馬曖之第四子也官禮部右儀衛性孝友咸通間與從兄嵩入

閩遂卜宅於同禾里五都郭山鑼鼓山下郭有家譜

宋

許山字純靜性至孝事嫡母蘇病日夜奉侍衣不解帶凡古人所稱滌器廁楡皆親

為之卒年六十六歲吳錫琮探許家乘

蔡挺卿天性肫摯父患病諸藥勿瘳挺卿剖股投藥父飲之立愈遂以孝聞

府志舊志

元

顏應祐字孝先賢聚人元末以兵難遷徙失母許氏所在訪求二十六年足跡幾遍海內行至雲南蜻蜒嶺始得焉遂迎以歸士大夫咸歌詩以嘉其孝上官民望贈詩曰閩泉南詔各一隅道途相去萬里餘巴巫水急過於剪關索嶺峻能摧車顏生遠來憂且喜視之不啻如平砥客中見母迎母歸此生始信堪爲子吁嗟世俗日已漓爲梟爲獍不自知事父母能竭其力顏氏之子其庶幾後人以應祐比朱

壽昌祀鄉賢及孝悌祠

通志府志縣志

沈祥事父母盡孝至正甲午盜起祥負母逃海中之嘉禾嶼盜躡其後祥爲所掠幸計脫而不知母所在衝賊鋒行求晝夜號呼不飲食者三日始獲之巖穴中母子抱持悲喜交集欲渡海回居而橐裝旣入盜手乃質子章獲錢數緡爲歸資其事兄最友數日不聚卽中心欲然知世將亂深螫不自號隱高人韻士或來賦詩爲樂閭里交口稱良士章洪武初科鄉薦上春官會時需才急不俟會試選吏部考功主事祥歿章請宋學士濂銘其墓

明

吳德范初名潛嘉靖戊子舉人與父蘊俱以毛詩起家兩同計偕後罷公車歸父已卽世匱中忽有污水流出德范慟哭舐食之授西安知縣家人有憂貧者報書倦倦道作吏之難不欲乘之以貪污而勸其謝絕外事杜跡縣庭竟以骯髒得調卒

祀孝悌祠

張鳳徵字舜夫號治庭青嶼人生而穎敏襁褓中輒能識璧上字九歲通五經大義嘉靖辛酉舉人乙丑進士觀政御史臺素善病力疾辰入申歸不少懈病劇給假行至張家灣而卒鳳徵孝友淳篤嗜善若渴不善謹避之而已與遊者咸飲醇焉歲己未里中倭亂鳳徵與仲弟鳳表皆將縲去乃出所攜金祈免其一鳳徵謂仲曰吾弟幸有子其負若子出營金贖我卽不能辦幸毋以我爲念鳳表卽曰兄善事父母且未子必不可留相推久之賊怒目大叱幾割刀已感其義獲免人以急難爭死兩難之後鳳徵子實賴鳳表撫成之子繼桂萬歷乙未進士任華亭松陽知縣

顏宏字篤任唐魯公後豁達篤孝友嘗赴秋闈臨場適母病奔歸朝夕奉湯藥衣不

解帶者旬日以兄歿子幼二親老遂舍舉業傭書代耕上事下育所得學資分散從弟姪之貧者歲時朔望事先盡禮二親忌辰雖年遠哀哭如初喪教子弟及鄉鄰里黨必先孝悌忠信見人死喪窮乏輒罄囊助之食無重味一盂而已人稱一孟先生嘉靖初有薦辟之詔林希元丞南大理與王宣同薦督學潘潢行縣聘主

邑社學辭不就

閩書參林次崖文集

顏敦祥字篤禎與宏同族天性孝友筋躬勵行博通經史尤長詩章甘貧守道教授鄉里生徒出其門者咸知禮讓居父母喪枕苫寢塊者三年家貧不克葬衰絰不解家居邑之金門所郡倅聞其名求見之以衰絰辭倅固請遂以衰絰見縣官屢

聘賓筵輒辭不就

舊志閩書林次崖文集

蔡秀鍾字士精號毓昆父環碧嘉靖辛酉歲貢不仕為諸生祭酒秀鍾幼善病弗竟舉業弱冠入永春為塾師已去而為掾吏小心謹畏引繩踐矩是時吏道尚寬諸吏率執法占貲咸嗤秀鍾空自苦且何以為子孫地秀鍾笑曰若乃以身試法即幸免遺子孫危也吾留與後人種者心田耳性孝友事父母先志所嚮得其歡有譴訶輒惶懼不食率妻長跪得解乃已庚申島夷內訌自永聞報馳歸會倭猝至

棄妻子弗顧獨負攜父母以逃二人俱老行數步輒憩秀鍾左右覘賊且逼守而泣乃引匿石旁窟穴如是者三竟獲免父謂庚申以後吾身子身也又時語子孫非而父遭賊又矣辛酉父應貢厲郡城秀鍾從永春令受事大府僦居異舍隔里許晨昏問視無曠從兄客死永中有欲沒入其貲者爲紀喪事籍餘貲歸其孤孤周歲庶氏危病絕乳適妻方育子使並乳之中年老於家族推主宗事植孤弱範弗率一裁以義祖墳旁爲鄰生盜葬夷原墳而假一象墳於左實族子陰與爲市挺身白官得復舊大小宗祠圯毀修葺不遺餘力居家儉慎周密與人交直心以出無脂言飾行御子孫甚莊課讀維勤年六十七卒子用明孫復一

節遜菴全集

張宏綱倭寇之亂其父遂夫與弟宏猷皆被擄索金贖宏綱家貧無所得金度父無脫理乃入巢泣說賊曰某年幼雖假貸無與不如歸吾父吾父歸則金可得矣賊質之爲刻日而歸遂夫遂夫終無所得金至期賊酋令縛出與其弟斬之宏綱復給賊曰父歸必有金可遺弟速之賊又如言而遣其弟弟既脫宏綱乃告賊曰家貧甚金實不可得吾以全吾父與弟耳賊怒曰黠兒乃爲汝所賣懸於樹焚死之

祀孝悌祠

舊志

樓明鳳性至孝終身孺慕父嘗患病醫者皆云弗治明鳳號泣禱天願以身代因刲

股和藥以進父病頓瘳人謂孝感所致

閩書舊志

王肇禎古莊人與父伯騰網魚牛鼻溪騰溺深處禎躍身援溺會同儕者亟拯禎出

禎曰未出吾父也投淵求之竟與父偕殞祀孝悌祠

舊志

胡旦字子熙號見塘莊江人年十五時兄坐誣殺人不能明逮繫縣獄旦挺身代之從獄中求識達人授書問字益廣其智年二十三始得白出而後成室旦四歲而孤其奉先至謹雖甚乏祭必豐祠堂火諭族人節約祠費更新之父妾以無出別嫁後靡依歲時賙救歿爲治喪有妹寡而貧召居傍近時解推之常傾困倒廩以賑諸兄弟之貧族有囂鬪力爲解紛不至速訟處鄉黨朋友一用忠誠有負之不爲變性重然諾貿易約束不用券盟早歲任俠有中表窘於龍溪尉尉捕之急旦開門匿之尉知持之急旦悉其家中橐奉尉曰恣君所取必問某人絕無也又急吾將生死之尉乃不敢言鄉有公利攘於豪右奮臂率鄉人白官復之旦通於醫藥爲人醫不受謝求者雖細賤必應之無分晝夜寒暑貧者併捨其藥資踰強鰥居終身不再娶以子明佐貴贈南京戶部主事

舊志

劉震春善事親凡甘脆之奉定省之儀終身無缺失侍疾廬墓悉根至性邑人稱之

閩書
舊志

蔡憲曾治親喪棺槨衣衾俱中禮度哭泣之哀晝夜弗輟一時感動鄰閭

閩書
舊志

蘇存明父死於外不能返葬存明請其母姨與母同居歿而奉以與母同穴有子二

人曰潤曰洧洧嘗出及暮乃歸白存明日適拾遺金俟其人返之是以歸遲存明

曰何如勿顧且日其人持金謝存明日吾所以謂不如勿顧也潤仕瀧水教諭存

明病心動棄官洧孫商霖爲邑諸生每言人於中夜將古人好事思量一番心便

軒豁又曰念到堯舜禪受氣象更有何物足掛胸中

閩書
舊志

蘇寵少孤倚祖爲命萬歷辛亥祖病籲天刲股進祖爲延數月竟不起里人欲白縣

旌之辭曰海濱人也何知有棹楔事蔣芳鏞爲序之

閩書
舊志

黃俞叔諸生能詩父商於粵十九年不歸俞叔躬尋至化川得之父已病瞽徒步負

父歸父目忽復明人謂孝感越年復歸其母於漳浦竭蹶終養族人文炤爲著興

山孝子傳相國李廷機跋之祀孝悌祠

通志
舊志
周璞園詩序

清

辛肇基爲諸生長興后塘人性至孝奉侍父疾衣不解帶父歿結廬墓左獨居三年風雨無閒仍設館里中以近其母夜則宿墓哭泣晝則躬治母膳妻見其衰絰不離淚痕常在卻立不敢接言廬中嘗失衾隔宿還故處人謂孝行所感云祀孝悌祠

林化衷城場人父得異疾三年不離側及病革割股爲劑以進父病隨瘳得終養十八年祀孝悌祠

陳祈猷性孝友事繼母得其歡心值海警索餉亟弟病被擄猷奔代備受拷楚卒得俱免外出經商所贏餘悉奉父母分給毫不自私諸姪之孤者皆爲聘娶

陳淑選五歲而孤貧窘異常母改適他姓淑選旣長迎歸孝養邑令鄧麟采額其門以獎之性樂善有德望捐資倡修樵星門邑令延爲鄉賓年九十餘卒

卓隆在坊人後遷居於仁德里家貧幼孤善事其母蔡氏時海氛方熾康熙二年令沿海居民遷於界內隆與母寄食於漳州寇發入城避之中途失母所在隆年纔十三呼號徧求不能得煢煢無所依旣而展界復歸於同娶婦舉一子然心念母不置以母失在漳遂負販於漳凡漳之重街復巷湫隘僻邃之處靡不到而於賽

神赴社廣會之場尤屬目焉以期或遇如是者二十年一夕至東郊浦頭有一父老過橋顛其子扶之謹隆心動號哭於道旁父老詢之具告以故父老曰無憂也汝往河南則得之矣余家城北汝他日來余當偕往隆如期訪諸城北無所爲父老居者遂疑爲神謀於婦鬻其子爲行李之資奔河南臨行與婦訣曰不見母吾不歸矣先是其母蔡氏與隆相失入城得老嫗同寓而復有少年女子色殊麗亦失其母流離道路間爲海鎮陳某所獲勿從出之依於蔡呼爲母頃刻不相離後女終歸於陳陳奉命應屯於洛蔡氏之入洛以此故也隆旣至河南偏歷諸屯所至開封遇焉悲喜交集母子相抱泣下嗚咽不能語時母年已五十有七失明負之歸而向所依之女歸陳者家已落故無所贈隆且丐且行有詢知其事者莫不爲之流涕由洛入閩取道揚子江江半風作舟將覆隆仰天大呼曰吾千里覓親歸而反陷親於非命則覓之之罪轉甚於不覓矣抱其母大慟須臾風恬同舟者俱賴以濟其母歸隆與婦侍養一十六年乃卒子曰五福自河南歸再舉者隆以壽終邑人多爲詩歌以美其事云

王生康熙甲寅海寇亂失寡母唐氏生遂棄家賣卜誓不得母不歸後十年宿潮州

大埔旅舍夢神人指母處明日得母於達濠鄉陳氏家白主人助以資斧負之而還居數年生至鷺島舟至遭風覆焉聞空中人呼孝子在遂若有扶而起者得一板附之以活

王家獎五世同居一門六十餘口男女各治其事操中饋五日輪一婦一物之微必長幼分嘗遷界時全家男女保聚如初所飼蜂房既分復聚鄉人傳其事邑令獎之

王贊槐世有隱德祖覲爲海寧州判遵遺訓五世同居贊槐益修其業而繼之內外無間言紳士爲作王氏五世同居詩以美之

許開金門後浦人其兄元領官糖往膠州船遭風壞元亦病故官捕元子貞償課貧莫能措將死開時外出聞知奔回亟將男女鬻賣代完臨別慘傷見者涕下事聞於鎮帥陳公龍爲捐俸一百二十兩付開贖回子女完聚時康熙三十年也

方惟正伯兄早逝撫孤姪如己子傾家財與次兄惟中營生惟中客死復往負其骸歸惟中子歿婦守志撫孤待之尤加篤云

陳獎芳陽翟人事母至孝家故貧甘旨之供雖遠必致母病瘋轉側須人獎芳出入

躬自負不令子婦分任二十年如一日母歿出告反面如在生前依依孺慕云
吳際斯字遜周號樸菴在坊溪邊人天性醇厚事親至孝服勤奉養極得歡心處兄
弟怡怡無閒雖至異居見有不足輒分財與之諸姪婚娶所需多爲經理父母喪
葬之費一己獨肩其任無旁諉也家雖清素雅好施與凡親鄰以窮乏告貸者靡
不竭力周旋鄉里翕然稱之延師課子敬禮備至子必達成進士官提督夫婦齊
眉就養於任均以子貴際斯卒時年八十有五妻王氏年九十三乾隆三十一年
必達陞見蒙御書賜萱壽延祺匾額褒嘉人以爲孝友純行之報

陳瑞映號湄齋在坊溪邊人受業於進士陳敬菴篤學敦行不求仕進父病瘋臥牀
褥十餘年瑞映衣不解帶奉湯藥謹調護始終罔懈通方脈凡延醫者皆不責報
兄弟俱年登耄耄友愛無閒又善教督子姪胞姪夢熊遠子韜韜章姪孫寧世
遊於庠貢於雍舉於鄉皆其所造就者也邑令張荃給匾獎之著課兒要言年九
十三卒

林德馨民安田邊人幼喪母繼母不能容父命與異母兄同居稚年未諳農務爲兄
所逐仍歸繼母德馨先意承志曲盡子道繼母病頭瘋延醫調治歷十餘年衣不

解帶繼母疾得痊爲之感悔且益加慈愛以辛勤創置田產與兄中分推腴於兄而自取其瘠築屋讓兄居之爲人排難解紛一無所取亦不自見德人服其正直黃錫明字奕遠號亮峯積善里錦宅人四歲而孤與兄二人相依一室母王氏青年勵節錫明家貧值播遷流離中時時負米百里外以養母雖未冠勞苦非所知展界後發憤讀書數奇不得志課生徒以奉甘脆者凡十年居平有所往必與母訂歸期勿愆或至期有挽留之者曰吾與老母約矣必奔歸慰倚罔望焉雖至戚良友莫能阻也旣而有邀以航海者錫明以路遠恐違定省久固辭母命之行乃行然每夜必焚香禱天願早歸侍母蓋未嘗須臾忘母也初至日本地多美妓同舟者皆惑焉欲誘爲己伍密令少年艷妓潛其室錫明堅拒之人疑其矯錫明曰余非矯也人子離親遠遊方寢不安枕而有閒情及此耶衆乃歎服素善飲終日不醉醉亦不亂將遠行母囑以勿飲自是旅邸遂勿飲人亦莫知其能飲者事兄如事父兄亡悲感成疾先世有祀田爲人吞噓力復之至今貧寡俱有賴迨建宗祠成族人多其功享諸祠子江登甲辰賢書官內閣中書濤辛未進士任湖北長樂令以子貴贈如其官

林起鳳烈嶼人監生八歲喪父遭海氛與母相失稍長竭力尋求於澳頭鄉許雲觀家得之迎歸偕妻石氏孝養無閒復遠涉臺灣遍求父墳不獲僅得一香爐攜歸奉祀篤愛同母弟起鵬買田宅給之延師教督後爲諸生食餼入成均里人李姓負官帑數十鏹質女以償如數與之歸其女貧佃逋租數百斛破券免之嘗遠遊經商舟至七州洋颶風大作溺舟甚多聞空中有聲云林孝子在此遂得無虞年七十二卒子孫蕃衍多雍庠

周特生安仁里例貢生九歲而孤祖流寓海澄歿葬焉海氛頻仍失其墳處父遍求弗獲抱恨終身特生稍長竭力訪尋閱二十餘年乃於新安周厝尾得之人以爲孝感事母尤氏盡孝母有足疾七年不能行特生出入起居背負片刻不離母病漸痊待兄恭敬凡事必請而行兄歿撫姪如子纂修族譜居喪遵古禮不用浮屠初窮困舊居湫隘後稍拓一屋七十餘口同居合食三十年無閒言

王三樂安仁里人監生少習舉業遭海氛播遷家貧親老治生供養日往返百餘里不辭勞瘁親疾侍湯藥無寧晷喪葬獨肩與兄弟友愛備至長兄早歿撫諸姪如己出所治家人產悉與弟姪均分毫不自私尤慷慨好施嘗施棺數百具修學宮

築橋梁周貧乏惟力是視無吝色邑令朱奇珍表其閭曰內行無慚

劉夢煜字質陽號敦行性孝友事父母能養志承歡與兄弟處囊無私蓄雍睦之風見推里黨生平好學工文章屢爲識者所賞不慕仕進以布衣終其身杜門課讀泊如也年五十五卒子先登乾隆戊午舉人定興知縣孫逢升乾隆戊申舉人

劉逢升字仲允號南吉先登第四子幼隨父官邸盛暑衣帶侍終日夜誦漏再三下不命之退不敢退稍長益自勵乾隆戊申舉人主輪山書院講席是時總督汪訪其學行下書郡守尊禮之子弟赴試或乘輿戒之曰吾少應郡省試每徒步挾冊且行且誦日行數十里誦亦數十篇汝曹顧遽求安逸耶其儉苦如此撫從子如子勛以孝弟持門戶奉祠墓資婚葬憫然如不及年五十卒著生芝堂詩集

劉氏世紀

陳延香探

吳惇字克垂號怡棠世居嘉禾里橋巷祖與父皆以太守貴贈通奉大夫兄弟四人怡棠其次也少穎異乾隆乙卯與兄洪功弟江同舉於鄉爲從來未有之盛家豐於財自男婦及僕婢內外整肅長幼有序家庭雍睦怡棠以身任家政竟不能出寄專城以爲國爲民故經綸未及展布於外時論深惜之遂於醫活人乃其餘事

子五長鹽運副葆年次葆濂歲貢生三葆晃戶部員外郎四葆瀾布經歷五葆初

太學生皆規矩循循有父風

摘亦佳
室文抄

周爲彩積善里窰山人少孤事母孝與二兄甚友愛兄歿無嗣爲之立後視姪如子
教養成人婚娶畢仍將自置產業子姪均分人以爲難

梁以鍾鴻漸尾人天性篤摯家貧傭工爲業兄患病侍奉不離左右遇乏食卽出爲
傭人以肉食相餉不忍自飽必攜歸養其兄凡數年自始迄終不衰鄉里咸義之
時邑令某書孝友二字額其門

黃傳在坊東門外東橋人父郎雙瞽業於星卜母陳氏無子傳螟蛉子也郎死傳幼
母子貧無所依至乞食以活後相失傳賣錫爲生遍尋其母至十七歲得之陳氏
已失明遂負以歸忍飢養母拮据娶妻每飲食必請母所嗜妻稍有難色傳勸誠
之其後妻亦爲之動母以老失明喜聽梨園曲以悅耳雖一二里之遠傳必負母
至演劇所稅椅與母坐僱里嫗陪母買備羹飯托嫗代炊以供之朝負出旣得所
託卽賣錫去抵暮歌臺響絕仍赴其處負母歸計其母失而復遇之後奉養二十
七年無一夕懈里人皆稱其孝母以乾隆二十六年卒年七十三越五年而傳亦

卒年四十九

高奇聰字淳敏鄉賓性孝友與其父振吾舌耕里塾朝夕得以侍養父葬在梵天首
崙結廬墓側哀慕三年曾祖父葬在長興里海氛播遷失其墳處奇聰竭力哀尋
十餘年始於塘仔後地中得之後買左右課地爲墳蔭祖父母歿奇聰獨肩不旁
諉也擇地彼九躍山寨仔頂葬焉爲諸姪完娶并以居宅讓其兄內外無閒言邑
令朱奇珍延赴賓筵贈匾曰孝友儀型母鄭氏享年一百二歲步履維艱奇聰朝
夕扶持始終不懈邑令劉興元復贈以母壽子孝匾額卒年七十四子育茂職監
孫以彰由貢生遵例急公賙贈祖父俱爲奉直大夫

杜梅健字文行馬鑾人住霞倉監生性孝友十三歲喪母號泣盡哀動鄉鄰時幼弟
梅仗方五月父外出梅健抱梅仗向里鄰乞乳日夜撫養事繼母先意承志父病
奉侍湯藥衣不解帶讓腴田於季弟親戚貪不能葬及匱乏者量力周恤子鴻猷
附貢生亦有孝德建宗祠置祭田孫瀛邑庠生

楊兼忠字敦誨竹坑人值海氛負親逃漳十載家貧而親足甘旨卒年九十五孫國

文乾隆三年舉人

鷺江志

池臯聲西邊社人事孀母楊氏以孝聞乾隆間以特用道銜效力河工六載大吏薦其才當補會母訃至或勸暫匿俟得缺發喪臯聲垂泣曰負親不孝欺國不忠忠孝俱虧焉用富貴卽日促裝冒霜露南下雖疲病弗恤也抵家撫棺一慟幾絕不
一月卒於苦寢今崎嶇有母節子孝碑

探鷺江志

陳元珩字崇懿父雲客邑諸生母鄭氏皆性嚴憚或怒元珩令長跪而已執業不顧良久令起煮粥元珩隨奉熱粥進父母怪所從來則元珩審知父母飢竊起煮粥而還跪家貧業賈朝夕必歸省歸必市豬腰以供膳父所嗜也密置金錢於牀頭不令二親知後賈臺灣恐厯倚閭望約五六日一寄書又懼爲風所阻先封數函託知交以次獻及歸海上舟忽不前者三四日而他舟日連檣西去竊怪之及至厦則前兩日颶風大作港內先至艘盡碎多溺死同舟人夢神謂曰爾曹獲生陳孝子之庇也由是羣稱爲陳孝子云

厦門志

呂仲誥字謙六居小走馬路少孤事節母謝至孝凡力所能逮靡弗至母病仲誥年亦衰猶旦誦經爲母禱者十餘載母歿哀毀骨立若無所依值生辰家不置酒自往墓次祭遶墓而泣聞者悲焉初母治家嚴仲誥毋敢忤或不懌率妻孥跪堂下

鄰嫗遇者咸歎息勸慰命之起然後起時年已四十五云子世宜道光壬午舉人

廈門志

呂福星字拱耀先世由泉州遷居廈門祖父皆隸水師行伍籍父江水歿時福星年甫十七諸弟皆幼母蘇氏攜福星請於官得補名糧籍福星素承先教精習步射以習藝勤得咯血疾母止之曰汝父歿遺四子汝得名糧育之今悉長成然皆出門謀生朝夕在吾側者惟汝耳吾不願汝官也福星遂不與大閱射道光二十一年英夷擾廈文武退守同城福星從每發口糧必請一日假攜珍味歸以遺母凡六閱月營官鑒其誠常許之母病冷積嗜麻雀羹福星領餉必如所嗜以進晚飯畢必侍母坐牀隅述日間異聞以爲笑樂泊母歿殯葬諸事獨身任之值忌日常泫然流涕卒年六十有七子澂光緒乙酉舉拔萃科以教諭補用庚寅領鄉薦

家乘林
豪撰傳

陳宗超字敦五號墨齋溪岸人振威將軍江南福山總鎮剛勇公之第四子也生四歲而孤家窘甚妣姚夫人郭夫人養而教之稍長入里塾讀書知講解卽欲求聖賢立言本旨搜舊篋得四書朱子全義讀之欣然有得謂同學曰讀書非以弋取

科名也要以身體力行爲有益逾冠入邑庠益潛心於四子書未壯領鄉薦每以剛勇公殉難親骸未歸葬爲戚會試罷亟往蕪湖尋之沿江上下屢瀕於險禱神示夢乃得之於采石磯古唐寺岡扶櫬歸而與姚夫人合葬焉歲癸卯復遵旨建專祠於采石磯往來營度凡八閱月祠成於是歲仲冬卒於祠中工次壽五十有五

林帶柑欖樹人有膽氣幼時父爲族匪所殺誓不共戴因幼弱姑忍之及娶婦生子喜曰今而後可以報父讐矣又不去身日夜偵讐所在卒殺之於龍眼園人無知者詣縣白冠玉自首讐家因賂白左右誣帶會匪定死罪其母請單子留養以無族長保結弗許及決帶跳躍怒號而呼曰天乎冤哉自今後必無敢有爲父報讐者有一於此而反戮焉長寇讐而滅國典生不能噉爾肉死必攝爾魄罵不絕口而亡滿城冤之多爲流涕死後白冠玉時時見帶驚恐成疾因請別調陞署興化

府疾逾篤嘔血卒

黃俊卿採

論曰林帶之孝孝之變者也父仇不共戴天禮經所載帶農家子未讀書能知大義以孤苦零丁必俟娶婦生子始報其讐處心積慮奮不顧身有合乎聖賢

之道雖死可無悔也白公以循良之吏因亂世而不得不用重典不數月而鬼以強死爲厲嗚呼死生亦大矣爲民上者蓋可苟乎哉

邱樹功提督邱良功功兄性伉爽少商天津家貲盡付季弟不問出入時贍族中貧者識功弟鎮功材善視之迨官守備猶歲資三百金貽書相勗陝西李眼鏡積負二萬餘金質諸官李詞屈而力不能償法當軍復爲營脫李趨謝則持其手曰非訟無以自解於同事顧君行家口何以爲生釋君則故交情分始全心始安奚謝爲晚年歸念仲弟婦寡守恤以千金又分千金予季弟囊橐遂空未幾卒於津家

中落時鎮功已官安平副將歲賜之

竹哇文抄

薛師儀號鼎臣官至金門總鎮少失怙兄師弼培養之服官時凡舉動必稟命母兄咸豐十一年帶兵往浙擊髮逆衆寡不敵被迫峽口溪邊顧謂士卒曰爲國捐軀雖不獲歸見老母某亦不責我不孝之罪爲臣爲子終於此而已正麾令反擊如見神人擁諸馬上躍過大溪賊不得近其感動有如此者居官廉母終哭泣盡哀與父合葬每公餘策蹇到墓如侍晨昏更於親墳對面自營佳城謂千秋魂魄常依膝下人嘉歎之

探許春開筆記

辛萬里長興里坂隴尾鄉人也壯歲充營伍以奉公惟謹授千總職性篤孝凡定省視膳必躬必親必歿三年廬墓寒暑罔間道光十一年儒學教諭卓訓導陳旌表以崱山孺慕十八年郡侯尙又以孝友可風四字匾其門考萬里卽孝子辛肇基之姪孫也

參葉升堂訪稿

陳蓬瀛字繹箴茂才錫瓚公長子世居同安北關外累代書香一脈相承掇芹香者十三世瀛自少承庭訓熟於經史及宋學清光緒丙子補弟子員事親至孝問安視膳不少懈每進甘旨必親自調奉父母疾親湯藥衣不解帶居喪則哭泣盡哀死而復甦者數次三年中酒肉不入於口椅棹有朱色者不坐值祖宗忌日雖遠必歸親自祭獻居家尤篤友于在族黨閒每推誠相與忠厚禮讓無閒親疏交友必誠必信人咸以理學先生稱之主任潯江學校每自館回必先省坟墓而後歸家後改任上海泉漳學校而卒運櫬歸里家人承遺囑葬於第一山母墓之側卒後家無長物唯見書筐中學庸論語諸書多所註解云

同安縣志卷之三十四

忠義錄

古稱燕趙多慷慨悲歌之士又稱西北之風近義言其習尚然也以視吾同則舍生取義國爾忘私尤有進焉同地多山軒敞環列以其峭拔之氣鍾之於人故生其地者類皆廉隅自勵不亢不卑其有膺專閫赴疆場或為國宣威或執干戈以衛社稷則又視死如歸有甲冑不可犯之色蓋忠誠貫日義膽填胸少成若性矣若夫懷二心以事主則動為清議所不恕降而黨派分歧朝秦暮楚廉恥無存名節掃地嗚呼三綱淪九法斃凡我人民欲於泰山鴻毛之間權衡死所烏可得耶世道之淪胥已非昔比不得已志忠義以為攜貳者儆有心人應同慨焉

宋 蘇 緘

明 陳 顯

葉秉乾

李 容

許厥猷

張 敏

劉 雄

周彝訓

胡有耀

郭 富

蔡希旦

黃岳家

范 方

郭寅日

葉翼雲翼俊附

陳弼心

葉 爵

林壯猷

張 顥

盧若騰

郭 超

陳鼎 張璇光 陳上義

清 洪有禎 蘇勇 李耀國 彭大猷 余壽

胡振聲 胥獻珪 陳紹芳 許攀桂 李長庚

張高生 劉高山 陳化成 周承恩 吳瑞興

李合成 黃志輝 邱成勳 邱聯恩 李啟明

陳上國 林向榮 許朝陽 彭奪超 李懋庸

李懋元 林捷輝 蘇有濟 陳勝元

殉難烈士

莊尊賢

附錄

許盛 周全斌 杜輝

宋

蘇緘字宣甫素負義氣寶元元年進士初授南海簿委查番舶商樊氏升階就坐叱杖之樊訴于州州責緘緘曰簿雖卑朝廷命吏也杖部民何罪之有州不能詰再

調陽武尉有劇賊李者州縣莫能擒緘訪得其處率衆入賊巢大索火旁舍以迫之賊從中逸出緘馳馬斬之送府府尹賈昌朝驚曰儒者乃爾輕生耶累遷秘書丞知廉州民茅竹爲屋多火災飭易陶瓦懲吏之貪墨者改知英州儂智高圍廣州緘募士數千人委印於提點刑獄鮑軻夜行赴難廣人有黃師宓者陷賊中爲之謀主緘擒斬其父復捕殺不逞者六十餘人招其罣誤者六十餘人使復業賊勢沮將解去緘分兵先扼其歸路與賊戰大破之奏至仁宗語執政曰南事淹時戰將未聞有成効蘇緘乃儒生能奮力如此宜加優獎授供備庫副使充廣南路兵馬都護監遣中使賜朝衣金帶牙笏以寵之賊至邕大將陳曙以失律誅緘亦坐貶房州州同英宗卽位以大臣論薦復供備庫使知廉州戍卒禧醉焚營延燒民居乘以爲竊緘戮禧於市坐謫潭州都監未幾知鼎州熙寧初進加京使廣東鈐轄知邕州充皇城使交寇陷欽廉乘勢逼邕破四砦緘閱郡得羸卒二千餘選士乘舟逆賊斬蠻酋二設方略分地拒守請救於桂州沈起劉彝獨遣一將張守節以怯懦敗外兵無一至者被圍四十餘日緘晝夜行勞士卒發神臂弓射賊所殪甚衆賊爲雲梯又爲攻濠洞蒙以華布緘悉焚毀之蠻計窮將引去而知外

援不至或教賊囊土傅城頃刻高數丈蟻附而登城遂陷緘猶領傷卒馳騎戰愈厲而力不敵乃曰吾義不死賊手亟還州治殺其家三十六人藏於坎迺縱火自焚賊至求其尸不獲城中吏民被屠五萬餘人潰三州城以填江初緘憤沈起劉彝致寇又不救患欲上疏論之屬道梗不通迺榜其罪於市冀朝廷得聞焉神宗聞緘死嗟悼至晡時方進膳歎曰可惜蘇緘近世忠義之臣罕見其比贈奉國軍節度使諡忠勇賜都城甲第上腴田十頃聽其家自擇以子元爲闔門祇侯召對便殿諭之曰邕州賴卿父守禦桂象皆得保全昔張巡許遠以睢陽蔽捍江淮較之卿父不能過也改元爲殿中丞通判邕州子孫與緘同死者皆褒贈起與彝坐謫官後交人謀寇桂州行數舍見大兵從北來呼曰蘇城隍領兵來報怨懼而引歸邕人祠之元祐中賜額懷忠祀鄉賢又祀忠義祠

舊志

明

陳顯洪武壬子舉人知德州太宗時爲燕王廉其才辟掌書院嘗乘奔諷諫旋以病

告靖難初遣使召顯夜沐浴具衣冠再拜而死祀忠義祠

舊志

葉秉乾慷慨尙義正統辛酉饑出稻二千石以賑貧民賜勅旌義勞羊酒復其家已

已沙尤寇羅興甫作亂請於官督民壯殲之山賊陳敬德攻縣掠鄉募義兵千餘從主簿蔡遴擊走之海賊張秉彝駕船二百餘圍中左千戶率兵戰卻之賊退復圍高浦秉乾力戰俘賊十餘斬首數百級賊怒鳩衆圍之豪嶺突圍被執脅之從大罵曰吾奉義討賊不幸力屈速殺爲幸豈從汝反賊誘之再四不屈支解之成化初御史涂棐奏旌其門曰忠義祀忠義祠孫元齡嘉靖初應義隨大兵滅汀賊

有祖風

舊志

許厥猷字曰圖城內人正統己巳間陳敬德寇厥猷仗義領兵討賊三月二十八日與賊張秉彝大戰於安仁里十四都後溪頭賊退據險覘強弱以邀我兵時兵力單薄且援潰戰衄於豪南山死焉年四十五歲

吳錫琮採許家乘補

李容號巽庵浦園人明洪武庚午舉人辛未進士官河南監察御史歷任四川提學僉事靖難兵起京師陷建文帝不知所終公爲方孝孺門下士抗節不居被旨抄

族聞者痛之

李族譜林次崖集有家探

張敏字輔德涪州人正統乙巳沙尤寇起敏季父益彬集里中人保障爲仇所誣逮長者戍軍幼丁闔割之敏與其兄張慶張本俱被闔送詣京師稍長選入內庭敏

雖幼而言動舉止迥異常兒凡有謀爲出人意表英宗擇爲青宮近侍事憲宗恭慎無過遇事婉諫微言憲宗嗣位敏旦夕左右夜具衣冠寢至子夜輒起以侍有所聞見未嘗外泄外廷諸事概不干預忠謹之名溢於宮禁嘗奉命操練騰驤四衛官軍兼理十九房馬政監督五軍大營未幾賜璽書總督十二團營敏持嚴而能推心體下偏裨士卒莫不懷畏前後賞賚若書籍圖畫蟒衣玉器金鞍之類不可勝數又於常廩外歲給米三十石特除其家戍軍籍五處召工圖其貌用璽識歲月敏兄弟三人同入禁掖俱見寵任兄本以御馬太監守備南京慶以司禮太監鎮守浙江而諸子暉鴻臚寺卿苗太常寺卿先是憲宗春秋高未子孝宗母紀太后以嬪御得幸有娠其時萬貴妃專寵昭德宮慮其妒害不敢以聞託爲病痞得廢居安樂堂庚寅七年遂誕皇嗣將溺之敏曰今萬歲未子卽不遽上聞何至棄爲自是加意養育紀太后乳少敏時獻餅飴粉餌哺啜旣彌月與西宮吳廢后保抱惟謹不使萬妃知以萬妃妒故亦不傳於外庭成化十一年孝宗已六歲憲宗尙未知敏密結萬貴妃太監段英乘間言之未得便一日敏爲帝櫛髮帝照鑑嘆曰冉冉矣而未子敏伏地請死罪曰萬歲有子也帝叱曰安得有敏叩頭言狀

帝命亟召見時孝宗胎髮未剪長披地走入帝懷牽衣遊戲手捋帝髯帝喜遂出示羣臣册立爲太子徙居紀太后於永壽乙巳敏被疾帝累遣太醫院診竟不起訃聞震悼賜銀幣爲殯殮具遣司禮御馬二監治喪復賜寶鈔二萬貫祭二壇戶部給齋糧麻布工部造墳特賜冠帽牙牌玉帶及孝宗嗣位追賜敏璽書官其家人於是苗累官南京通政使列於九卿質至錦衣衛指揮同知管衛事暉亦以慶蔭官光祿寺少卿食三品俸賜敏瑩地通州三百畝守卒二十人其後有錦衣千戶張鵬張臻百戶張宏恩澤之事閩所未有苗子定登進士

閩書舊志

論曰張敏以沙尤之亂被闖非得已也侍內庭而以忠謹著已難矣况又委曲以存憲宗之嗣周旋回護至於六年俾紀太后母子得萬全其功不尤偉耶以闖宦之微尙忠誠若此吾邑多節義之士不其然乎

劉雄字逸圃僑尙義兄早故獨肩子職經營致富所居積善里在泉漳孔道之傍官吏過往者皆宿其家供帳迎款不稍怠門下食客數百人多勇敢忠直之士藉以捍衛鄉井固守封疆正統十三年沙尤寇發由漳襲同雄度邑中倉卒莫備乃散家財萬緡鳩義衆率門客家僮擊退之邑賴以完賊大恨越日復率衆來攻正

交鋒閒馬逸入海淖中家僮八人奔隨之盡被殲焉賊復縱火焚其居闔家俱遇害惟妾吳氏先是攜三歲幼子往鄰鄉母家得脫難邑令爲視殮致祭葬之本里路傍龍亭嶺後八僮耐葬於右鄉人哀之稱曰義墳坡元孫存德嘉靖戊戌進士

保王遵巖集參
歐陽八山撰狀

周彝訓積善窳山人正統己巳歲倭寇近鄉倡義率鄉兵禦之馬陷泥濘中死之子懷炯以救父亦死之今其地號陷馬堰是也

胡有燿字子謙諸生素輕財仗義爲鄉人所信嘉靖戊午倭寇至其鄉有燿散財結社以禦之度力屈令其妻子宵遁謂之曰吾與衆盟義無獨去明日率其徒與鄉人併力爲拒賊計以脫諸婦女老幼力罷爲賊所得罵不絕口被戮獨慘事聞贈州同知給其子冠帶祀忠義祠

郭富字體仁後郭人慷慨尙義善射嘉靖戊午倭寇攻城中外震駭富奮不顧身從城上射殺二倭分巡盛公嘉其功賜以金不受越己未倭又攻城富率衆縋城而下追至埕西發矢又中斃一賊賊怒羣擁而前莫有援者遂爲所殺時五月二十九日邑人義而哀之

蔡希旦字可久號中溪習儒業弗遇力農以供親嘉靖庚申倭夷內訌念父未葬盡
出家中藏羅諸庭而身守之已而倭不至偕二弟趣嚴具自操杵鍤成墳至指盡
血既襄事而賊愈迫里中闔謀禦之推希旦爲首悉括丁壯得二百餘人晝夜巡
警而親勸督之數日賊大至衆相視質人色希旦挺身出衆從之賊揮刀引騎衝
其胸倭從之十砲齊發衆遂奔希旦立不動一人曰衆潰矣乃引卻已而賊三道
繞其後衆莫應者賊遂剗刃希旦死焉年甫五十希旦嚴謹仁厚嘗讀書野寺一
婦夜款門希旦曰可速去恐僧見辱婦固求宿乃大悲閉門不納寺有小僧暴卒
已就木矣希旦探其懷微温灸而起之旁舍嫗無子嘗向希旦乞食一日嫗不至
希旦曰必病也遣子往視則臥簣憊甚復持粥粥之嫗病尋愈族有子忤繼母父
怒將沈之水希旦曰子無狀誠當死然恐人以惑後妻殺前子也命撻之予以更
新子感激及遭難知不知無不流涕後以子守愚貴贈主事晉贈四川按察使

黃岳案崇禎初爲廣東英德尉四年寇犯城督兵戰死英德人祠祀之又祀本邑忠

義祠

雍正
志稿

范方字介卿後遷長泰博學礪行推重於鄉天啟辛酉解元性耿介聯同志爲社異

趣者擯不入與黃道周盧若騰沈佺期以氣節相尙試春官不弟見逆闖濁亂時事日非歸閉戶卻掃無任意崇禎初闖黨伏法乃更北上卒三困禮闈以道周薦國子監助教貧淡如常鬻文自給見流寇鴟張國計漸蹙每在學舍扼腕嘆息歷遷戶部員外郎以給軍餉籌守禦力言於主者未幾闖賊陷京師朝中或屈膝迎降或竄匿苟免或被拷掠索金獻至數十萬惟方及范景文馬世奇金鉉等數十人死焉方闖賊入整冠帶坐部署如故賊執之問倉鑰誰掌曰我掌問匙安在曰頭可斷鑰匙不可得鋒刃交下猶噴血怒詈濺滿署堂面不改色賊開倉鑰堅若錮斫門始得入人謂方魂實爲之其長子登楓爲邑諸生甫冠婚自家來省視適遇難揮之不去殮方既畢號痛出血數升絕吭其旁有老僕爲并葬於邑之義塋方著作甚富以海氛蕩析無存唐王時盧若騰署浙撫上方死事有持闖死義之幽乞補褒旌之闕疏有命范方被執不屈大節可風准察明優卹嗣唐王敗遂寢

祀忠義祠

通志顯微集

郭寅日崇禎辛未歲貢任陝西平涼府通判陞同知李賊陷城寅日不屈與二子皆

死祀忠義祠

雍正志稿

葉翼雲字敬甫一字載九崇禎庚辰進士知吳江縣故事獄鑰掌於縣丞多爲宦要禁無辜者翼雲清獄出之撤丞鑰自掌其害始絕家事無大小必手裁值歲祲粟貴奸民朱和尙乘機煽亂佯示寬縱卒掩捕無漏網者朝中黨起文選司吳昌時通盜盜倚內援剽掠無敢撻翼雲密使尉擒之昌時貽書爲盜地拒不聽忱以危語亦不爲動夏蝗飛蔽天按捕蝗法謂於露翅濕濡時便乃夜行田間督從者協捕蝗下令輕罪以捕蝗數爲贖蝗患既息繼以荒旱步禱龍祠日行數里凡設廠施粥買米平糶及浚河造船以工代賑無不備舉時國用絀議者欲因畝加賦翼雲條上其不便縣省六萬有奇十六年東陽之亂若禾兩郡大震翼雲念戍守單弱選精壯教以坐作擊刺相度形勢令城外四圍皆可馳馬增築臺舍其上書則戎服閱兵郊外夜則巡行闐闐偉然自成一軍北都變聞不軌者洵洵思亂廉得其主名捕殺之一邑帖然尤好獎拔才俊培植士類先是吳民詣闕懇再留巡撫祁彪佳上其治狀巡按周元泰亦上言葉令才守爲上上考任滿將入都以催科不及格爲吳昌時黨與所阻乃寓寺中吳民譁曰何忍以吾曹累公爭相輸納不旬日竟二萬七千五百有奇投櫃贏餘發修理承天寺吳民建祠祀焉臺臣歎曰

生祠去思碑皆可作而致惟卸事之官不事敲朴而完糧幾至三萬非深得民心

者不能起為禮部精膳司轉儀曹晉吏部清吏司郎中以親老乞歸唐王入閩擢

稽勳司員外以便宜視同安縣事素服興師城破與其弟翼俊同殉難闔門死焉

時年五十有二清諡烈愍翼俊以倡義兵授監紀推官節本傳林志遠撰參松溪文獻吳江縣志

陳弼心崇禎元年戊辰武進士任南京都司歷大同參將甲申殉闖賊之難府志選舉注

葉爵字尊侯蓮坡人崇禎十五年壬午武舉人歷官南京參將後死難於許灣廈門志

林壯猷十二都周邊人崇禎間為銅活哨官福王時遷都督同知守永定移駐同安

清兵至城陷舉家死以殉舊志

張灝字為三巡撫廷拱子也萬曆朝登進士官兵部職方司郎中明亡隱大嶝後入

臺灣卒於澎湖年九十有五臺灣通史

盧若騰字閑之號牧州一字海運賢聚人崇禎丙子舉人庚辰進士御試召對稱旨

授兵部主事黃道周沈方沈佺期引為同志以氣節相尚會閣臣楊嗣昌奪情起

用督師湖廣玩寇佞佛若騰劾其罪下旨切責天下壯之累遷武選司郎中總京

衛武學三上疏彈定西侯蔣維祿惡其直外遷浙江布政使司左遷寧紹巡海道

瀕行又劾內臣田國興攬帶貨船濫用人夫辱州縣阻閘口有旨逮國興抵法至浙潔已愛民興利除弊勢豪屏跡莫敢逞蕩平劇寇胡乘龍等閭里晏然浙人建祠祀之福王立南京擢鳳陽巡撫若騰以馬阮當國綱紀大壞辭不起貽書劉宗周云自古未有文武不和能成大功者今文武相貳勇私鬪怯公憤正不知所稅駕耳明年夏至錢塘而南都亡及唐王立福京下旨徵辟單騎赴召授浙東巡撫駐温州督師北伐特薦宿將賀君堯爲水師總兵募靖海水兵扼守要害以族弟游擊將軍若驥守盤山溪爲藩衛奏簡學臣考試以取人才收士望從之是歲温州大饑捐資賑濟得旨嘉獎加兵部尙書銜魯王起兵紹興號監國其臣不奉福京之命以兵窺温州有兼併意賀君堯勒兵拒之而于穎亦有撫浙之命若騰疏言十羊九牧號令不一恐誤封疆請自撤不許鄭彩之殺熊汝霖也衆畏其勢莫敢言若騰直揭其罪朝士振悚帝英明果斷有知人鑒而鄭芝龍專權日事驕奢大學士黃道周嫉之奏請出師窺江西途次以門生爲託若騰復書相勉許已而道周殉難紹興之師亦潰清軍迫温州若騰與君堯力守平陽糧絕不繼七上疏請援不報溫民擁署呼曰願公爲百萬生靈計若騰曰若欲降耶先殺吾民涕泣

批

散叩紳士王瑞栴等議城守瑞栴曰人心已死非口舌可挽相持痛哭城破率親兵巷戰背中三矢爲靖海營水師所救乃與君堯脫入江上疏自劾命族弟若驥赴行在聞閩事壞痛憤赴水同官極起裂眦曰是不欲成我也鄭鴻逵招回閩尋潛入滄洲圖起兵道出寧波父老迎謁垂涕遣之見事不可爲仍回閩之曷山與郭大河傅象晉輩舉兵望山欲乘閒圖武安近寨餉絕興師戰不利嗣同葉翼雲陳鼎入安平鎮轉徙鷺江偕王忠孝沈宸荃曾櫻許吉璟辜朝薦徐孚遠郭貞一紀許國輩居浯島上自號留庵永明王因閣部路振飛疏薦召拜兵部尙書道阻不得達時鄭成功開府思明招徠遺老若騰依之禮爲上客軍國大事時諮問焉成功卒張煌言貽書謀復奉魯王監國會王薨乃於永歷十八年渡臺至澎湖病亟夢黃衣神持刺來謁忽問今是何日侍者以三月十九對矍然曰是先帝殉難之日也一慟而絕遺命題其墓曰自許先生年六十六若騰風情豪邁當時士大夫幸博一第則近地山海之饒率擁爲世業或以爲言夷然不屑晚一意著述自天文地理下逮蟲魚花草宏通博雅品藻古人成敗得失反覆淋漓斷制嚴謹至於感遇憂愁憤懣之什皆根於血性注灑人比之蔡忠毅道憲所著有留菴文集

二十六卷方輿圖考三十餘卷活洲節烈傳與耕堂隨筆島噫集島居隨錄島上

閒偶居寄印譜各若干卷通志臺灣外紀金門志鮎埼亭集續閩書林霍詩話蠡測彙

抄獻雲文
抄合參

郭超後倉人明都督使福王入閩從黃道周勤王石齋甚重之為立匾於家廟中郭

家探
族譜

陳鼎更名命鼎字子凝號象圖祖籍漳州北溪仍入漳庠天啟丁卯舉人甲申變後

躬自耕稼混跡緇黃唐王在閩復本邑教諭清兵至城陷鼎自縊於明倫堂

張璇光號義山浯島人磊落自豪讀書有獨得年二十冠童子軍補邑弟子員踰年

餼於庠崇禎之季時事日非自傷不能借箸報國每劇飲盡醉慷慨悲歌或繼以

痛哭及甲申聞都城煤山之變絕粒數日不死持巾櫛嘆曰太祖頒諸生巾自冠

臨朝三日取前庶人後三公之義為諸生者獨不可以三公之義自効乎自櫛髮

赴里中井脫朱履其上投井中水淺僅沒其半乃俯首就淺水中死聞者奔援之

不及時年二十有六曾孫時霖乾隆甲子舉人述其事京中公卿及同鄉紳士各

賦詩為贈標曰表微錄太守萬孺菴武榮洪良堂序之節張氏
家傳

陳上義全禾里三忠宮人也狀貌奇偉膂力過人恆留心於經濟之學明室傾覆諸王繼敗黃道周等立唐王聿鍵於福州建元隆武招募四方豪傑不次擢用公以勇而知書應募以軍功陞總兵未幾清兵南下公嬰城固守無援而陷清人愛其勇欲降之罵曰羯胡我子孫誓不爲汝官豈但我哉殉節而死

陳宗河采

清

洪有楨字亮士嘗授徒里中督其子弟甚嚴謹丁亥兵起有楨從俠客糾海邊壯士數百人守漳浦城陷被執見大帥有楨挺立不跪目直髮上指旁執刃者皆大駭帥怒命縛於市磔之懸其頭於城東門暑月血色數日不變青蠅無敢集久之一卒投其頭於濠於是門卒皆病中夜狂叫若有物擊之者乃相與求其頭羅拜瘞之有楨工書法做文徵明賈人持售外國得重價歿後隻字之遺珍於拱璧

舊志夕陽

寮存稿

蘇勇字大弼石潯鄉人爲人忠直勇毅膂力過人隸同安營千總時康熙庚申海氛甚熾苦難勦滅勇慷慨請纓率兵攻之搜索海氛屢次報功賊殲矣勇誓必擒酋身先士卒進攻之間被礮傷沒於軍年二十六事聞於上奉旨優卹加贈守備照

守備陣亡例襲雲騎尉子興字俊傑襲職遷居銅魚館

蘇氏家譜

李耀國汶沙保山前村人澎湖左營守備康熙六十年赴臺灣督造戰船適朱一貴作亂回澎率兵勇隨師往剿戰屢勝追賊入莊被圍賊斫馬蹶斷徒步接戰中餓幾陷軍士奪回郡城創發而死題授安平游擊署升銅山參將未任事聞加恩襲

雲騎尉

家傳

彭大猷水提標外委林爽文之役提督黃仕簡樓船東征以大猷爲前鋒從復諸羅攻斗六門將軍常青令分扼北門柴頭港南北路賊大會圍郡城攻北門大猷合諸軍出死力與禦賊退援麻豆莊以兵少幾陷遇救得脫隨剿南潭克之旋戰歿

於陣嗣子得恩襲雲騎尉

廈門志

余壽涪洲人乾隆間以外委戍澎湖擢把總臺灣林爽文莊大田作亂日攻郡城壽隸游擊蔡攀龍麾下分一隊數撓大田賊黨進克鳳山府城急回郡兵僅九百勢不敵壽及軍士誓死決戰殲賊數百黎明賊四面環圍壽率藤牌兵直搗東北角射殺執旗賊賊卻忽肩中流矢拔去負創再進暈仆連呼殺賊而卒祀昭忠祠世

襲雲騎尉

金門志

胡振聲字子容號成菴父貴任廣東提督諡勤愨振聲入伍十五年補澎湖把總乾隆五十年隨澎湖副將帶兵赴杭水操拔千總著水提標守備從征臺灣叙功補臺灣守備嘉慶二年陞玉環營參將玉環父貴舊治營建義倉日久耗蝕振聲別弊補闕復其舊四年授廣東龍門副將還留浙獲劇賊得書按名搜捕盡獲由是名震海上蔡牽每遇振聲輒竄去一日被圍急易小舟遁獲其舟卽溫幫左鋒船也檄署溫州鎮以屢獲賊實授本鎮總兵官先後雖奏捷以未獲牽引媿會牽擾臺灣調閩堵截九年六月諜知牽北竄會海壇鎮孫大剛閩安協蔡定國澎湖協張世熊齊追至西洋望盜船七十餘皆艨艟巨艦且佔上風諸軍遲留不敢進振聲揮船獨發把總馮光陞跪請曰少須合諸軍齊進振聲曰我以身先衆船其肯後乎有頃復跪請曰公不念先夫人耶振聲潛然出涕曰毋多言已再鼓曰是何地也敢再言者斬連發巨礮斷賊船桅賊死傷甚多諸軍率制下風但叫呼助軍聲卒莫肯前牽見我軍援絕乃率新附梁山幫小船二十餘艇合圍之振聲柁工忽中傷風帆欹側遂被槩而仆牽念振聲同鄉不欲傷其命以鷄皮裹藥貼傷處振聲揭去大罵不絕口遂遇害事聞加提督銜賜祭葬諡武壯入祀昭忠祠世襲

都騎尉子廷恩襲

廈門志

胥獻珪號元圃爲廈門後營千總署澎湖左營守備乾隆五十一年林爽文亂帶兵隨游擊北援諸羅師至半天厝遇伏陣潰見攀龍坐馬重創急換騎賊大至衝突不能出力乏被執諭降不屈賊怒支磔之事聞賜恤世襲雲騎尉子德恩襲任本

省陸提右營守備孫貞咸襲任至廈門守備

金志

陳紹芳後崎尾人千總大鱗子嘉慶十二年以水師提標後營外委從李長庚擊艇

賊於廣東甲子洋乘風搏鬪右腿中礮死子承恩襲雲騎尉

廈門志

許攀桂安平中營把總海寇蔡牽竄入鹿耳門攀桂分駕快船力戰被賊砲焚死海

中廕一子外委祀昭忠祠

李長庚字西巖生而倜儻警敏甫入塾卽弄筆書天生我材必有用七字性至孝母喪旣除益讀書習騎射乾隆辛卯科武進士藍翎侍衛屢扈南巡乾隆四十一年補浙江衢州都司累遷提標遊擊太平參將樂清副將林爽文亂臺灣閩中求良將於浙提督陳大用以長庚應遂入閩護海壇鎮總兵掩捕南日湄洲之賊數十人餘黨解散會鄰海有民船被盜誤指海壇者被參革職長庚出家財募鄉勇率

子弟操舟出擒盜首林權等數十人又擊盜陳營於大岞盜善火器長庚迴舟據上風以長竿繫月鏹斷其帆繚髮眉皆燎躍入盜船斬獲以歸福郡王平臺灣歸加禮善遇之檄郡縣曰李某用火藥所在支與之海盜林明灼陳禮等入浙戕參將張殿魁總督屬長庚捕之遂獲之奏功以遊擊起用五十五年署銅山參將選鋒自隨作商人裝屢獲賊明年丁父憂去官五十九年補海壇遊擊仍留銅山六十年安南夷艇始入閩閩人驟駭長庚以小船入擊之三澎救商船賊舍商拒兵長庚麾兵伏船內待賊礮盡過賊東發一礮碎其舟餘盜夜相逼計寡不敵乃以八船首尾纏爲一詰旦賊東來則以東一舟應之至八西來亦如之迴環至暮賊乃去嘉慶二年授澎湖副將定海鎮總兵三年至定海時累更盜患艇夷登岸劫擄婦女官士嬰城至是始有所恃夏擊盜於衢港窮追入山東界獲之秋攻盜於普陀明年秋擊盜於潭頭皆斬獲無算閩盜鳳尾引夷艇入浙共百餘艘長庚追擊至温州沈其一艇守備許松年等三船困於賊長庚返舟入賊圍救出之窮追至廣東甲子洋遇蔡牽再擊之總督玉德巡撫阮元奏其事奉旨賞戴花翎五年五月至寧波與巡撫阮元提督蒼保議造大艇船三十以攻夷盜六月夷盜大小

七十船復入浙阮元謂賊多非會剿不可剿非有謀勇者爲統帥不可於是奏以長庚爲總統長庚旣統水師遂條申軍令曰一定海鎮船居中軍用黃旗總領用五色方旗黃溫二鎮居左用紅旗總領用五色尖旗閩鎮居右用白旗總領用五色尖旗一中軍船畫行插五色旒夜懸三燈將領二燈弁兵一燈中軍船起頭篷之後掌進號一次者紅旗行二次者白旗行三次者黃旗行一遇賊船無論何鎮先見者卽插本色旗使後船見之仍視中軍所持五色方旗所指前後四方隨指追攻若中軍掛五色旗於大篷者收兵一各鎮雖分三色旗又於本色旗心黏他色以別其隊何隊犯令卽罪其領隊者一中軍船高插五色旗者收畧夜中軍船放火號三支各總領二弁兵一亦收畧支更譙警夜見有外船近者鳴金一陣各船互傳見盜近乃擊之毋遠而亂若收畧旋須行者中軍插三色旗各船毋放杉板船入海一遇大盜宜安靜前後左右以旗進退之遲者亂者按以軍法旣追盜盜返篷擊我我毋避如有船陷賊本隊遲救者罪其長一追捕遇無風時必加櫓若心怯將篷或鬆或緊者罪之前船若速必回待後船後船不加速而亦回住者罪之一泊舟各總領船插黑旗禁縱兵上岸一中軍傳將備出黃旗傳千把外委

出藍旗傳隊目柁工出紅旗一兵船獲盜船以盜賊物爲賞兵船遇礁門必魚貫爭先者罪舵工六月安南夷艇鳳尾盜六七千過閩入浙逼台州松門將登岸巡撫阮元勒兵於太平松門擊之二十二日長庚率師至海門將會黃巖鎮謀攻取夜颶風起明日風益甚盜船覆溺於松門外僅餘二三船漂出外海海門兵船亦多損長庚船隨潮溢入田挂木而止賊在松門據破船及泗水登岸者黃巖鎮率松門兵縛桴合水陸悉攻俘之獲安南四總兵印及僞爵侯倫貴利磔之又獲安南王勅擲還安南自是夷艇不復入浙海秋長庚以夷寇雖滅閩盜尙有水澳蔡牽乃修船往來閩浙間屢獲劇盜李出丁郭林俊新楊烏李車黑陳帖李廣高英等船冬擢福建水師提督總督玉德以長庚福建人奏請迴避調浙江提督六年新船成乃入閩駕歸浙初阮元以造艇銀鉅萬付長庚曰船乃兵將所寄命文官不善於工請公自造之長庚曰公不疑我我當任之命守備黃飛鵬及族人齎銀入閩造艇至是艇成名曰霆船最堅壯加以大礮兵威大振夏擊於岐頭東霍等洋擒獲甚夥七年春獲盜張如茂船於浙潭頭獲徐業船於閩東滬是時水澳等賊以次殄滅海盜畏霆船勢頗戢八年正月蔡牽匿定海北長庚以舟師掩至牽

僅以身免追至閩糧藥盡篷索朽遣其黨千道員慶徠乞降於總督總督不虞其詐招撫之牽又言果許降勿令浙兵由上風來逼我總督調浙兵居下風牽以其間繕器備物揚帆去總督大怒趣浙兵擊之已無及矣十一月擊牽於三沙沈其船一牽北竄蹙之於溫林南兜奪其船二沈其一焚其一斬獲無算是年兼攝定海鎮凡十閱月蔡牽畏霆船厚賂閩商更造船之大於霆者令商載貨出海濟牽用商歸岸偽報被劫牽得大船遂能渡橫洋渡臺灣九年夏劫臺灣米數千石及大橫洋臺灣船會閩粵間盜朱瀆斷糧牽分米飽之遂與瀆合八十餘大船猝入閩海溫州總兵胡振聲以二十四船入閩運船工木總督遽檄振聲擊之振聲陷於瀆死之賊勢甚熾六月玉德阮元會奏請長庚總統閩浙水師以溫州海壇二鎮爲左右翼專捕蔡牽秋牽瀆同入浙八月追及之於馬蹟牽瀆結爲一陣長庚督兵衝貫其中賊分東西竄逐至盡山沈其二船斃牽船盜數十人俘餘船五十餘人終入以牽船高未獲遁去牽責瀆不用命怒先返自是牽瀆始分牽亦少衰長庚建議禁商造大船無爲盜齎十二月瀆結粵盜伺金廈長庚擊走之奪其船二於甲子洋牽擾臺灣調福建水師提督責捕牽十年夏牽由臺入浙復擊之於

青龍港浙江提督孫廷璧不諳水師復調長庚爲浙江提督九月被風於盡山所部船多損冬牽聚船百餘復擾臺灣結陸路無賴萬餘人屯州仔尾沈舟塞鹿耳門阻官兵十二月長庚至臺不得入牽分力回拒臺府城得不破時南北汕安平大港門三次尙通小船長庚扼之別以小澎船五十令金門總兵許松年澎湖副將王得祿進攻之焚獲三十餘船盜千餘人十一年正月長庚令許松年進柴頭港自領兵截港外松年得祿水陸夾擊之焚獲甚夥二月令松年夜入洲仔尾焚其大船盜至鹿耳門者掩至長庚遣將以火攻船從南汕出其後燒之松年進蹙之焚斬無算二日復登岸擊陸賊以火焚其小船尸橫七八里賊大敗棄洲仔尾困守北汕內僅餘五十六船七日東風大潮驟漲鹿耳門所沈舟漂去賊奪門出長庚追擊之奪其船十餘而牽竟遁去四月牽潰在福寧追擊之牽入浙又擊之於台州八月擊之於定海漁山長庚專擊牽舟牽瓦石火器雨下額身皆受傷牽復遁去九月擊牽於閩之竿塘獲牽姪蔡添來十二月擊牽於溫之三盤多所斬獲牽自鹿耳門遁入內海甚狼狽篷柁皆毀四月至福寧得岸奸接濟易斬篷勢復張長庚皆列狀奏聞十二年春追牽入粵擊之於大星嶼四月擊粵盜鄭一於

佛堂洋獲其二艇七月請回寧波辦軍政詔飾之八月卽出海十一月擊牽於閩之浮鷹十二月牽福建水師提督張見陞等追牽入粵廿五日質明至黑水外洋牽僅存三舟長庚以浙江親軍專擊牽一舟斃賊甚夥又自以火攻船挂牽船將成擒忽賊發一小礮適中長庚喉遽殞閩帥張見陞本庸懦又窺總督阿林保於長庚事事掣肘頗不受提挈及是遠見總帥船亂遽率舟師退牽乃遁入安南夷海中阿林保以其事聞上震悼哭之廷臣亦哭詔曰浙江提督李長庚宣力海洋忠勤勇幹不辭勞悴懋著威聲數年以來因閩浙一帶洋盜滋事經朕特命爲總統大員督率各鎮舟師在洋剿捕李長庚身先士卒銳意擒渠統兵在閩浙臺灣及粵省洋面往來跟剿艱苦備嘗破浪沖風實已數歷寒暑每次趕上賊船無不痛加剿殺前後殲斃無數擒獲盜船多隻蔡牽亡魂喪膽畏懼已極聞李長庚兵船所至四處奔逃正在盼望大捷之際乃昨據阿林保等奏到李長庚於上年十二月二十四日由南澳洋面駛入粵洋追捕蔡牽望見賊船祇剩三隻窮蹙已甚官兵專注蔡逆窮其所向追至黑水洋面已將蔡逆本船擊壞李長庚又用火攻船一隻乘風駛近絀住賊船後艚正可上前擒獲忽暴風陡作兵船上下顛播李

長庚奮勇攻捕賊船礮子中傷咽喉額角竟於二十五日未時身故覽奏爲之心搖手戰震悼之至朕於李長庚素未識面因在洋出力疊經降旨褒嘉並許以奏報擒獲巨魁之時優予世職李長庚感激朕恩倍矢忠盡不意其功屆垂成之際臨陣捐軀朕披閱奏章不禁爲之墮淚李長庚辦賊有年所向克捷必能擒獲巨憝朕原欲俟捷音奏到時將伊封授伯爵此時李長庚雖已身故而賊匪經伊年年痛剿之後殘敗已極勢不能再延殘喘指日舟師緊捕自當縛致巨魁况李長庚以提督大員總統各路舟師今歿於王事必當優加懋賞用示酬庸李長庚著加恩追封伯爵賞銀一千兩經理喪事並著於伊原籍同安縣地方官爲建立祠宇春秋祭祀其靈柩護送到日著派巡撫張師誠親往同安代朕賜奠并查明伊子現有幾人其應襲封爵候伊子服闋之日交該督撫照例送部引見承襲其長庚任內各處分著悉予開復所有應得卹典仍著該部察例具奏以示朕篤念勞臣恩施無已至意部臣以伯爵請得旨李長庚著封三等壯烈伯承襲十六次襲次完時給予恩騎尉罔替其卹賞銀著再給四百兩全祭葬賜諡忠毅忠毅無子以族子廷鈺爲後襲爵忠毅治兵有紀律恩威兼施諸盜皆畏之爲之語曰不

怕千萬兵但怕李長庚海盜沈振元自言爲盜時泊浙海夜夢公至一夜數驚遂革心投誠爲水師健弁公家故豐悉毀於兵事好讀書究韜略爲詩古文修寧波學宮置義塚爲粥食餓民士民皆感之舉武科會試卽航海入天津識海中形勢及在水師識風雲沙線自持柁老於操舟者不及之在兵船緘所落齒寄其妻吳氏蓋以身許國慮無歸櫬也健將許松年王得祿等皆公所薦拔者朱潰後爲許松年礮所斃其弟渥率衆降於閩八月十八日福建提督王得祿浙江提督邱良

功始共殲蔡牽於温州黑水洋

參阮元集李次青先正事略

張高生前園保人少投水提標理帆繚拔中營把總初獲盜於石美樹兜南園後屢有擒獻歐水結會滋事至洲卽日擒縛之新來舵刼石浦米船逃入閩乾隆六十年從金門鎮李芳園戰於南日獲所刼米督撫賞給銀幣遊擊陳名魁以爲能署爲選鋒令扮賈船梭駛銅山南澳間遇賊畚州佯北軍士伏不動旣迫乃大發砲矢賊驚遁名魁從上方掩至夾擊擒賊明天追及宮仔前坡覆其舟時有林潭爲蔡牽先鋒最趨捷難捕嘉慶元年名魁擊殲之又於湄州遇柯佛船曾在浙刼鎗砲名魁麾兵急擊高生首先躍船搏鬪執縛之七月戰青水洋賊飛砲傷其右腮

透入唇屹不動其冬又獲艇船於獺窟三年正月圍侯煥於斧頭灣獲五舟鉛藥
砲械無算五月從遊擊蔡安國追賊船甫交右手虎口被鎗傷額中石擊高生不
顧先躍賊船砍殺衆從之賊下海死俘二十七人以功調南灣左營守備嗣送金
洲船至浙江遇風覆沒北甌予恤襲

廈門志

劉高山字文錫號止亭少讀書見海寇日熾乃從戎嘉慶二年隨總兵李南馨剿賊
於佛堂灣蔡牽出烏坵逐商艘高山追及之五堡牽脫去奉檄扼將軍灣遇艇賊
殲之復攻之於蘇尖賊圍南馨船高山直入殊死戰以擒賊拔外委猝遇賊於廣
東汕尾焚其艘旋從擊朱瀆於南灣長汕尾我師少衆心動高山犁舵直進諸船
競奮乘風飛擲噴筒賊多燔瀆中創死又殪蔡牽義子補經制外委賊泊店子灣
天寒港險高山乘潮進奪其艦擒賊無數調赴海壇轉閩安戍安平拔把總道光
元年同守備陳得揚外委林應昌哨瑯瑪蘭洋突見白底盜船牽餘黨也約左右
夾攻賊竄入碗光灣灣下皆鹵古石舵師怯高山拔劍叱之自犁舵攏擊持巨斧
手刃數賊賊忽大至猶搏賊力盡而死賊旋就獲磔祭之事聞用副將例賜卹昭
忠祠世襲雲騎尉高山性恒率疏財負氣屈於數奇功多爲人奪與楊康靈等號

五虎皆海上飛將也子紹勳官至廈門後營遊擊

案牘

陳化成字業章號蓮峯泃洲人幼端重智勇過人尙氣節有擔當宇宙氣概年二十

八入伍拔補水師額外連殺賊數起以功最拔外委嘉慶六年李長庚督閩師一

見大奇之曰此名將才也命麾下善視之七年以攻盜拔把總十年又六月李長

庚在青龍港緝賊令化成戰艦隨行生擒盜匪拔千總十一年扼蔡牽於鹿耳門

十二年二月在粵洋首先衝擊蔡牽船十二月又攻牽幫船於浮鷹洋獲其舟斬

其匪長庚列事以聞陞銅山守備又以屢獲洋盜補烽火參將道光元年陞澎湖

副將八月陞廣東碣石總兵旋調金門總兵六年五月臺灣匪徒滋事帶兵前往

督捕調臺灣總兵十年二月授福建水師提督在廈提軍凡十年海波不揚小醜

惴伏莫敢動二十年復以防海需才令移鎮江南扼守吳淞化成益感奮激昂誓

以死報國時夷目就撫廣東將撤防化成獨謂款約不可恃請留所部兵弗去冬

雪方盛平地積數尺時掉小舟往來海濱風浪中或踏雪按行部曲嫗姁如家人

軍中呼陳佛吳淞以東西礮臺爲犄角西礮臺在海口北距寶山六里東礮臺在

其南險與西稱暎夷擾浙化成扼西礮臺以守凡三閱寒暑欽差大臣裕謙嘗以

大風雨夕偵化成見化成危坐帳中鈴柝聲琅琅然也二十一年八月定海再陷三總兵同日戰死鎮海失守裕謙死之吳淞民恃化成爲固明年四月夷陷乍浦戈船三十艘震逼吳淞時牛制軍艦與總兵王志元在寶山懼商於化成化成曰無恐以礮扼險可決勝第坐鎮毋輕出入也於是率參將周世榮守西礮臺而以牛王守東礮臺化成夜語世榮曰吾與汝福皆不薄周愕然化成曰詰朝戰而勝則受上賞不然亦俱不朽非福而何明日夷船排江進化成登臺執紅旗揮戰轟礮及千聲自卯及巳壞夷船六七艘賊沮欲退我軍噪而奮牛制軍聞師利趨出及三里賊從檣上覘其幟駕礮狙擊之制軍跳而免師遂潰東路軍棄礮走賊併力攻急周世榮請同奔化成拔劍叱之曰庸奴誤識汝世榮逸賊登岸礮彈雨下中化成顛復起猶手戮巨礮創重歎血死年六十有七同殉者守備龔齡增以下合八十餘人夷酋旣入城犒飲鎮海樓酒酣或作華言曰此行良險使有兩陳公安能至此哉越十日嘉定令練廷璜購化成尸獲積葦中而如生殮於武廟百姓罷市哭奠繪像二一留吳淞一貽其子狀聞詔優卹立專祠賜祭葬予諡忠愍世襲輕車都尉子七人長廷瑛福建水師千總次廷華浙江錢塘水師都司廷芳襲

世職廷棻欽賜舉人

國朝先正事略黃鈞宰金壺浪墨亦佳室文鈔龔顯曾亦園勝牘

周承恩字君然號碧峰在坊人歷官金門守備愛恤士卒而勤於巡緝所部洋面肅然以獲盜功調升臺灣安平中營遊擊護安平副將道光二年張丙作亂隨總兵劉廷斌援嘉義戰歿於鹿仔草事聞以參將例賜恤子向辰襲雲騎尉官金門能舉其職後以遊擊帶兵至仙遊剿賊死於陣

金門志

吳瑞興石滄人屢從提督陳化成巡洋以捕盜勇敢累遷金門右營把總署千總咸豐五年十一月初七夜巡至中港海濱見盜徒數十乘龍舫小舟登岸直前捕之中賊礮傷項卒時護總兵蔡潤澤護右營游擊陳宗祥以賊匪無蹤欲捏報別情而瑞興長女日號哭於鎮署前當道不獲已以死事聞賜恤襲如例

案牘

李合成安平左營外委嘉慶十一年自北淡水大鷄籠從副將邱良功沈朱潰黨巨艦蔡牽入鹿耳門協力禁卻之復擊朱潰戰死滬尾洋賜恤襲如例祀昭忠祠子

秋香襲

金門志

黃志輝后浦人負膽略能戰以隨剿南北洋功擢烽火門守備題升金門左營游擊嘉慶十二年後總兵許松年追朱潰下南灣至長汕尾及之首壓賊艦奮擊賊艦

壞志輝船亦撞碎我軍撈救猶大呼我死不足惜急擊勿失沒於巨浪潰亦獲誅
事聞賜恤世襲雲騎尉祀昭忠祠子忠貞襲任三沙游擊

邱成勳提督良功從子以白衣効力行間嘉慶十四年良功追剿蔡牽於漁山船比
兵接成勳奮身格殺中傷落海淹沒牽亦斃事聞照把總例賜卹世襲雲騎尉

邱聯恩字偉堂前浙江提督良功子也生穎異有父風良功卒年僅八歲聞訃迎喪
哀毀如成人事嫡母吳生母王以孝稱弱冠襲爵爲乾清門侍衛道光癸卯選授
直隸通州副將甲辰調河間協副將所至紀律嚴明得兵民心咸豐癸丑二月粵
寇擾近畿聯恩始防留智廟後防景州寇皆不敢犯甲寅六月陞河南南陽鎮總
兵時武漢新復逆匪下竄聯恩率隊駐光州堵禦戰於息縣殪匪千餘擒擒首丁
心田而黃家莊一帶匪遂滅跡乙卯二月以防固始信陽功賞花翎當是時楚皖
髮捻並起髮匪由蘄黃直趨武漢擒匪張落刑擾歸德竄光州出入穎亳間聯恩
嚴防楚豫交界以杜北竄先復息縣丙辰正月赴歸德勦擒數戰皆捷斬馘數千
亳州久被賊圍兵至立解又攻克潁河賊巢斃匪無算九月襄陽土匪擾鄧州新
野回軍往援適落刑圍陳州聯恩登陴固守時出奇兵縱擊落刑東竄去十月鄧

州失守移師恢復之並破秦集薛集各踞匪楚豫交界斷賊蹤焉丁巳二月匪復竄回豫境屯浙川光化之間聯恩督小隊往勦猝與賊遇山深箐密我兵被圍不得出聯恩躬冒礮火衝賊陣七次斃騎馬悍賊數十人賊始驚潰是役也以少擊衆威名震遠近皖以南無不恃之爲長城矣匪復北竄陷內鄉聯恩拔隊往援克內鄉斬逆首朱中立於陣及餘匪二千餘跟踪至屈家灣搜捕賊黨殆盡落刑又竄光固聯恩馳抵光州踏平鳳尾集賊壘十餘座進攻方家集老巢又破之光固皆平賞圖薩蘭巴圖魯八月與勝保會師夾攻正陽關克之十月抵泌陽之銀洞山獲勝餘匪繳械降十一月督兵入內鄉西山搜剿竄匪山絕險蠶叢鳥道馬不能行聯恩徒步奔馳足皆重趼至十八盤山石磔硤嵯峨上下數十里氣喘不得屬天寒雨雪泥沒髀尺餘人馬多墜深礮死聯恩亦屢跌屢仆攢行較遲糧垂盡士卒皆忍飢覓路而賊早已遠遁巡撫英桂疏劾剿辦稽延奉旨摘頂翎聯恩旣出險料賊必竄泌陽遂由角子山出馬谷田邀擊之連戰皆捷生擒捻首胡倫修殺餘匪數千老逆張汶成挾死黨百十人匿查牙山高洞中聯恩乘夜往攻悉數擒獲所過村莊鎮集男婦老幼莫不遮道跪迎餽送牛酒不絕以爲將軍重活我

也英桂復奏剿匪出力奉旨賞還頂翎並令駐紮汝寧以爲後路聲援戊午春皖匪陷麻城黃安迭次往援匪皆紛散麻黃既復匪竄商城聯恩率師翻越山嶺歷八晝夜及之三戰三勝殺賊千餘遂駐商城防回竄八月移師陳州次息縣巡撫恆福檄調駐光州會落刑擾周家口聯恩分兵轟擊賊狼狽宵遁正躡追閒恆福又調駐鹿邑賊得回踞亳州己未二月聯恩聞歸德圍急由鹿邑督四千兵馳抵李家口是時賊向西竄馬步數萬剽行甚疾寧陵睢州相繼陷聯恩捲甲窮追戰於夾河套逍遙集殺賊二千餘克二城救出難民無數恆福疏劾剿賊遲誤奉旨奪職聯恩自以受國重恩誓死滅賊常提孤軍轉戰數千里赴艱涉險寢不解甲顧受文吏牽制冒觀望名感憤不能平乃慨然有致命疆場之志矣嗣落刑竄至舞陽之北舞渡將圖北犯聯恩繞道截遏欲迫之沙河一鼓成擒二十五日行抵打虎橋墓誌作喫虎橋待考距北舞渡二十里匪已蠶擁來撲聯恩大隊猶未至親出迎敵將士莫不死鬪自辰至未歷四時狂風忽起天地晝晦隊不能收賊騎數千分兩翼壓陣而下聯恩激厲親軍奮力抵禦賊聚愈多勢漸亟乃躍馬衝入賊陣橫刀左右砍殺身中數創馬蹶遂遇害年四十八歲十餘日得屍面如生尙凜凜有怒

氣恆福以狀聞文宗震悼詔開復原官以提督例優卹賜祭葬予諡武烈南陽北舞渡及原籍准見專祠子三人炳忠炳信炳義

李啟明楊肇基皆邑人官廈門把總道光二十一年英兵至總兵江繼芸赴水死啟

明肇基殉焉事聞賜恤如例

歡雲文抄

陳上國字克潤號愧堂馬巷內官鄉人父必高官外委於乾隆五十二年死臺灣林

爽文之難給雲騎尉世職必高無子以族弟舉人貫中子上國爲嗣并承襲焉道

光二十年英人陷廈門上國方水師提標學習接仗七次無怯色時鴉片禁甚嚴

洋商多勾結內地奸民窩囤銷售上國奉檄查拏獲邱宣陳乾陳往蔡莊又以訪

拏蔡炒陳光營等匪糾衆拒捕上國額腦中石子傷幾斃而遇敵仍不少縮提督

竇振彪深器之次年在温州洋擊沈盜船三隻獲李買等十八人二十四年權千

總獲戕官要犯陳狃等十人皆置極典上國捕盜善偵蹤跡購眼線而又蹈危涉

險誓不返顧故自官千戎至署游擊所破劫案至二十餘起生擒劇盜至二百餘

人落海淹斃者尤夥有李忠毅邱剛勇風咸豐三年海澄黃得美倡小刀會踞厦

門上國隨總統李廷鈺進剿所向輒克復以功升游擊賞戴花翎其時黃得美雖

誅而興化土匪林俊猶據仙遊巡撫王靖毅公檄上國起軍營差遣隨大軍搗賊巢生獲烏白旂匪首陳尾等爲先鋒陳萬年賊中驍桀也上國斷其左腕梟其首以獻事平補海壇游擊加副將銜六年四月出援江西駐建昌府城南髮逆屢勝相持半年賊脅土寇四面環攻城陷上國率勇力戰歿於陣年四十二歲事聞詔以參將例賜卹又給一雲騎尉世職

林向榮字戰志號龍江馬巷柏頭鄉人道光十三年入金門鎮營爲戰兵在洋緝獲海盜陳芒王七陳甘康田陳妙陳改王信蔡華李買林進林應陳分陳爾等數百人牽獲及擊沈匪船多隻在鄉躡獲林密林塗林衣陳牛楊晚魏勇林兜等及烟販褚克配施工吳勤涼等數十人總督劉韻珂以爲能奏請鼓勵以千總應升之缺儘先補用二十六年間又在洋迭獲林賢略魏正林坻林垵等補南澳守備旋升海壇游擊咸豐三年升廣東海門參將未抵任值廈門黃得美之亂因雇勇不慎落職旋捐資募勇隨總統李廷鈺攻復廈門開復原官四年補水提中軍參將逾年護海壇鎮總兵在南日外洋擊沈匪船二隻擒胡阿好等在湄洲洋攻獲盜船一隻大礮二尊擒蘇松等升閩安副將八年四月鍾大紅等由江右竄閩上

游陷邵武郡縣圍建寧破浦城松溪政和崇安建寧等邑檄署建寧鎮總兵先後克復各城池七月戰於毛墩塔嶺師挫革職留任八月又進攻吉陽斃其丞相楊甲大將軍鍾大紅黃純富兵部曹甲移師建陽搜獲楊三等斬之以功復職九月授廣東碣石鎮總兵調臺灣鎮同治元年三月臺灣土匪戴萬生作亂戕官陷城南北路皆震向榮率師進討駐入掌溪候糧大雨溪漲糧不時至退紮鹽水港巡道洪毓琛以向榮進兵延緩揭諸省巡撫徐清惠公奏請暫行革職是時賊圍嘉義急鎮道不相能向榮催糧輒不應軍心漸懈向榮乃發書至家傾家資七千金募親勇五百人赴援六月進攻解嘉義斗六圍七月復剿滅大崙等莊閏八月賊又圍斗六向榮星夜馳救苦戰十日圍復解賊偵知我軍乏糧十三日率衆十餘萬來攻飛書告急糧與兵皆不至兵勇採樹子刮木皮撈浮萍羅雀鼠充饑死亡相枕藉賊圍益急十七日賊以牛車載草焚燒壁壘蠡擁環撲向榮督勇死拒血戰徹夜抵晨陣亡屍被支解年四十九歲胞弟附生林向臬次子外委林張成從子署外委林忠成勇首林福林烈林子義林廷邦林敏姪孫外委林其壽額外林其隣林名才林立林大猷并親勇四百七十八人殉焉妻吳氏聞變絕粒死洪毓

琛奏請開復原官賞給騎都尉世職賜祭葬七百兩七年御史范熙溥奏請建立專祠上以向榮血戰損軀忠節萃於一門隨死將弁至數百人均屬深明大義准於臺灣府城並本藉地方建立專祠從死者一體附祀光緒十六年欽奉懿旨賜祭一壇嗚呼勞臣勤事之忱朝廷旌忠之典可謂兩無憾矣

許朝陽游擊鵬飛長子屢隨提督竇振彪在浙江擒洋盜補廈門後營外委咸豐二年小刀會黃得美據廈門朝陽駕船隨提督施得高討之於蓬礁開礮攻擊斃賊無數被賊一礮打斷雙股猶大呼殺賊者三而亡年二十七事聞賜恤世襲雲騎尉

尉祀昭忠祠

金門志

彭奪超字逾洛金門人少孤母撫之長充金門鎮左營椀手隨竇振彪巡洋以戰功拔補外委署千總咸豐三年小刀會黃得美踞廈門同安金門石碼震動總兵孫鼎鰲檄奪超署右營守備籌兵籌餉獨肩其任民賴以安賊黨林沙等以戰船犯中港及金龜尾後豐港勢張甚奪超派兵分守以戰艦夾擊賊潰伏誅同廈旋平久之巡洋先後獲盜升補南澳守備以剿滅安溪賊首李興等奉命統師船防艇匪於同治元年護理督標水師營參將時李秀成等竄擾浙豫延建土匪應之奪

標奉檄赴沙縣援剿勤巡哨嚴城守民倚爲重偵賊集順昌進兵討之力戰方酣
伏發軍潰左右請速退超叱曰我爲國死汝曹自爲計遂大呼陷陣而卒事聞交
部從優議恤照參將例恤賞世襲雲騎尉子聯登襲

誦清
堂稿

李懋庸字炳輝號鴻山增階三子少能文納粟爲國子生三試南闈不售乃投水師
爲戰兵屢隨提督竇振彪出洋緝盜獲朱祿魏正林候等咸豐初會匪黃得美陷
廈門隨總統李廷鈺往剿獲股首黃逢日僞副元帥陳必又隨總兵孫鼎鼈巡洋
獲謝元等積功洊升守備十一年隨閩安副將吳鴻源追賊於崇武洋風逆戢帆
進船碎與曦暘同沈於海死總督慶端奏贈一級以千總難蔭世襲入祀昭忠祠
李懋元字正亨長庚從姪孫隨增階出洋獲海盜十餘起官廣東電白游擊咸豐十
年升山東登州鎮總兵旋隨僧邸剿捻匪復淄川縣城題提督旨飭先回本任卒
李家世官水師皆能以功名顯海內以比漢之北平然李廣立功邊塞數奇不侯
長庚則裂土胙茅澤流奕世爲有異耳

林捷輝字齊甫後浦人父俊元金鎮稿識屢隨總兵陳化成竇振彪巡洋風潮沙綫
靡不熟悉先是母舅劉高山官淡水把總攻捕洋盜沒於陣上官將以他故誣陷

捷輝次兄穆如時在臺灣據實申理事得白如例優卹高山子詔勳襲職捷輝長兄焜熿憐而養之爲延射師購良馬命同捷輝習射遂以善射知名時蔡黨蔡誅黨尙夥捷輝屢剿捕金門左營千總管帶師船進擊盜船至深水外洋自起操舵犁擊兩船撞以搭鉤短兵接巨礮無所施捷輝擲火藥礮於賊船紛紛落水我軍亦傷乃拔劍大招曰隨我過船得賊資悉分給我軍帶傷齊奮忽大風捲浪鉤折賊船乘勢颺去捷輝恨甚咯血得疾歸病革大呼殺賊手擊牀作鼓聲卒年三

十四

家乘

蘇有濟字汝經銅魚館人工楷法善書啟讀書手不釋卷再試不遇卽棄儒就幕初爲張呂諸鎮軍司筆札奇其才擢爲參謀甲子李侍賢擾閩張呂在延平師陷有濟就義年纔四十耗至同里學博林騰驤弔以詩云戎馬書生報國恩劍津唳鶴間哀猿運籌應得元戎眷絕筆猶傳故友言無復杉關歌振旅空從梓里賦招魂他年立傳昭忠異烈士應能慰九泉

倪燭采

陳勝元字建珍號曉亭殿前鄉人少習風濤沙綫跳盪超距之術年十八隸水師籍越兩年復補縣武生道光三年拔額外六年拔外委十年升把總十二年臺匪滋

事提督陳化成派隨進剿升提標右營千總尋升海壇右營守備以勇於捕務爲化成所器重遂擢水提標右營游擊二十一年署中軍參將時英夷滋事勝元隨總督伯壽駐紮廈門以夷船連踪至退守同安得旨褫職遣戍經新任總督劉韻珂奏留在閩差遣贖罪旋以督造哨船出力留閩捕盜黨搗盜巢擒盜魁開復原官尋升福寧左營游擊實授銅山營參將咸豐元年升山東文登協副將二年擢福山鎮總兵三年粵匪自武昌竄安徽兩江總督隆建瀛檄勝元赴江寧督水師進剿時賊船由太平府界合山順流而下勝元督飭游擊周鼇等帶領各船官弁兵勇迎剿擊沈賊艦餘匪隨退官兵追至蕪湖逆船蔽江東下夾守兩岸乃由陸路前進開礮擊沈逆艦二十餘隻沈斃逆匪不計其數兩岸匪黨亦被礮傷適逆船乘流復下勝元中礮落水沒於陣經江寧將軍祥厚奏入諭曰江南福山鎮總兵陳勝元奮勇勦賊臨陣捐軀深堪憫惻着加恩追贈提督銜卽照提督陣亡例賜恤以慰忠魂尋賜恤如例諡忠勇賞騎都尉兼雲騎尉世職襲次完時以恩騎尉世襲罔替子宗凱襲職四子宗超光緒丙子科舉人

參本傳及行述

殉難烈士

莊尊賢字育才灌口安仁里徐厝後人幼讀書至十五歲即營米布商業及壯遭家不造父母妻子相繼染疫亡煢煢孑立愈思以其身為國家死時清政不綱外交失敗尊賢愴懷時局念非改革政府無以圖存遂入同盟會與同志莊右南發起公益社及農務分會組織天然養生畜牧公司集工二百餘人密聘有軍事學識者訓練兵法陰圖擴充同盟會鼓次革命辛亥武漢起義尊賢親率灌口健兒光復泉漳兩郡所有費用概外洋捐款及自己私資未嘗徵取諸民也革民成功解甲歸里毫無權利之心迨哀民僭位改元洪憲尊賢義憤填胸復召集舊部於灌口寨仔湖蜘蛛湖白虎岩山口廟等處請保定軍官學校畢業生潘節文為教練官與士卒同甘苦士卒素有非為者尊賢朝夕勸解繼以痛哭皆感激用命凡先後進逼嚴溪林墩等處軍皆捷民五五月五日朔夜率革命軍一百八十餘人攻城身先士卒與潘節文俱歿於陣年四十有一骸骨埋城下凡五稔十二年四月自治軍前敵司令張貞籌款遷葬於霞翟保車路墘為築烈士紀念碑

陳延香採

附潘節文事略

潘節文字敬號離恨春人慷慨有大志常以班超自期許十八歲入閩陸軍小學校辛亥升入南京陸軍第四中學八月

武昌起義還閩謀響應充閩南安撫使教練官旋為新軍營長和議成辭職赴京師入清河陸軍預備學校民國三年卒業見習於陸軍第十師復升入保

定軍官學校袁氏叛國稱帝應莊尊賢之請至灌口教練討袁軍丙辰五月偕莊尊賢率師攻城身受巨砲聲言我輩為共和流血死亦何憾恨不及身見汝曹隨洪憲以消滅耳殉義時年僅二十六後與莊尊賢合葬譯有戰略詳解不良兵教育法夜間教練法又著劍影廬詩詞集其感懷七言律云時局茫茫盡不平滿天風雨作愁聲窮途退多奇險亂世是非無定評才大遭讒悲屈賈功高羅禍弔韓彭英雄零落千秋恨讀罷離騷夢尚驚

附錄

許盛字際斯號武巖康熙三年自海上率眾歸城授參將銜屯墾南贛時三藩齊動閩粵荆湖諸師躡入江右破郡邑贛為數省咽喉盛率屯兵前後二十餘戰解寧都楊家寨富江等圍復石城萬安泰和上猶龍泉等縣招撫嚴自明戴順曾猶龍而斬敵將陳昇凌之亮何鼎陳可韓大任等以功授南贛總兵晉秩右都督轉左復剿崖石寨降其魁朱明授拖沙喇哈番予世職盛少遭亂失親骸至是匍匐悲號墟莽間乃得其處二十七年移鎮襄陽道經武昌值夏逢龍之亂幽閉城中身被四矢以計脫隨清兵討平之時值仁廟南巡盛迎見於宿遷驗閱箭傷後為言者所劾溫旨許盛矢志忠貞所奏無據以原職出鎮宣府兩次出口隨征噶爾旦以老乞歸捐資二千八百金修邑文廟及明倫堂鄉賢祠卒於家子廷瑞商邱知縣廷瑜通判廷瑤常德府

參舊志府志

周全斌字邦憲浦邊人有文武才略嘗爲刀筆吏於漳州後從鄭成功入海康熙元年兩島破海帥多歸命全斌亦遣子入質福州率所部從鎮海衛來歸封承恩伯四年靖海將軍施琅統師討臺灣總督李率奏以全斌副之至青冰溝遭風引還召回京屯墾外郡有從征羅刹之勞

臺灣外志家譜

杜輝弟杜達灌口人康熙二年自海上歸清輝授總兵官左都督銜達廣東都督銜四年授輝廣東右路總兵官七年缺裁候補召京考試弓馬特授輝雲南永北鎮總兵達以原銜隨兄之任十一年值吳三桂亂兄弟俱被脅至湖廣密遣人赴大將軍貝勒王軍前訂期內應謀泄兄弟均被戮家屬僑寓廣東事聞贈輝光祿大夫達祿大夫賞給家屬回籍銀兩並米石等物

舊志入忠烈

同安縣志卷之三十五

循吏錄 附宦績武績

古者三載考績官與民近夫是以政無不舉國無不治亦越漢唐循良之吏史不絕書明清以降仕途稍雜而官方澄叙考課綦嚴循聲治績口碑載道者往往有之同邑瀕海地屬要衝文則觀察民風武則建牙專閩言外交則設專員言民治則資守令在在與吾民休戚相關淪肌膚而浹骨髓固不待芘黍興歌甘棠致詠始覺其政聲所著足為後之守令斯土者勸也志循吏

唐 劉日新

宋 黃琮

陳宗霖

黃彥暉

鄭公顯

余元一

毛當時

石 懿

朱 熹

方士端

羅 烈

蕭 里

元 馬哈謀沙

孔公俊

明 游 明

汪 洎

時執亮

王 琬

劉性同

朱 徽

張 遜

張 伋

龍 越

趙汝弼

邵旭 許仁 葉允昌 袁杉 郭山

王仲玉 彭士卓 李時芳 譚維鼎 胡文宗

鄧一相 萬善 徐待 曾如海 洪世俊

王世德 李春開 黃文星 徐應秋 李燦然

曾履泰 熊汝霖 吳嶽 熊一中 何文宣

劉珣器 歐陽祐 謝與源 徐正敍 曾一甌

陸佶 陸佺 李榕 鄭耀 姚全

章文 王仁 林叢 劉章 鄧鸞

侯崇學 王尙賢 車任重 楊立 周淵

徐麒 沈有容 呼鶴鳴

清 黃允芳 楊芳聲 徐名觀 蔣沛 陳國柱

朱奇珍 史正治 唐孝本 陳任賢 單瑞龍

孫圖南 白冠玉 潘文鳳 張元鼎 楊文榮

馮國柄

唐

劉日新光州固始人仕唐為金紫光祿大夫乾符中黃巢寇閩日新領兵追至大同

場休營於寶勝山下開浚陂以資軍食歸京未幾復出討賊老於此營孫崇敏事

陳洪進歷永春龍巖令入宋遷仙游令弟崇牧亦予官其裔曰半千與蘇仲昌同

時召試賢良方正直言極諫科會罷大科不果試

府志吳錫琮補

宋知縣

黃琮字子方莆田人元符三年以進士知縣事清操不渝有惠政民生祀之與陳麟

翁谷號三循吏又祀名宦

舊志

陳宋霖字元雱一字元滂長樂人紹興二十一年邑令朱文公為簿每日相與切磋

講明經義為政廉平後陞秘監

閩書

黃彥輝字如晦莆田人宣和三年進士紹興間差知邑縣裏山表海寇盜陸梁申安

撫司創築城壁周環六里安撫司奏保與減磨勘尋以使牒監納軍倉苗米剷除

諸弊奸人不得逞乃撫拾專斗註誤欲以汚彥輝監司按覈無毫髮瑕疵可指遷

潮州通判卒贈大中大夫

參莆田志

鄭公顯字隱之龍溪人乾道二年進士淳熙中知縣事有惠政歷右侍郎兼左司郎

中學問淵深尤長儷語

閩書

余元一字景思仙游人淳熙五年進士知縣事增築縣城改號清嚴終池州通判府志
毛當時嘉定間知縣事有惠政修明朱子之教專祠以祀之行事多取法焉祀名宦

舊志

縣丞

石斲字子重臨海人第進士紹興中由桂陽主簿來同爲丞時天旱民饑縣白府請
蠲租太守怒檄斲杖其主吏斲上記太守曰杖一吏細事耳然所係則大民今皇
皇無以爲命縱不能救忍箝其口乎守怒未已遣幕官往案驗至則希守意以爲
不當蠲斲爭益力部使者聞之因以委斲既行視歸卽揭榜諭民蠲之什九且亟
召鄉吏閉廨中使鄉爲一榜戶列所蠲與其當輸之數既成立授里胥使走揭其
所矯曰此上官意也邑人德之斲與朱文公友善歿爲銘其墓祀名宦

閩書舊志

主簿

朱熹字仲晦婺源人後居崇安紹興戊辰進士二十三年任主簿涖官以教養爲先

務革弊興利緩急有序事無大小必親裁決賦稅簿籍逐日點對以防吏弊利於民者雖勞不憚民欲爲僧尼者禁之選秀民充弟子員一時從學者衆建經史閣作教思堂訪求名士徐應中王賓等以爲表率日與講論正學規矩甚嚴五載秩滿士思其教民思其惠至今以斯邑爲過化之地其作述政績之詳具載於大同集立祠在學宮之東配以許升王力行呂大奎邱葵林希元五子又祀名宦閩書舊志

方士端字德明莆田人以授室宗郎補登仕郎試吏部復授右迪功郎紹興中調主簿代朱文公文公才之攝尉得盜當受賞棄不肯顧其節槩如此後遷知福清縣

卒文公爲銘其墓祀名宦舊志

縣尉

羅烈字子剛長汀人建炎二年進士授邑縣尉寇揚勃自劍州趨泉烈部兵扞捕邑恃無恐再調興寧亦有禦賊功終知廬陵縣烈喜著述有博文新說十卷古文類證數萬言註杜甫詩事類千餘條行於世閩書八通志

蕭里字元舉龍溪人力行好古以周禮名家登慶元二年第調縣尉一介不取當時有嗜學如饑赴義如渴之稱祀名宦舊志

元

達魯花赤

馬哈謀沙字端甫阿魯溫人至正十五年任同安達魯花赤先是安溪畚寇攻破縣城哈謀沙至以石修砌十六年春寇再攻西門復分三屯以拒之賊衆潰去泉之伊守禮嘯聚攻郡城遣徒脅邑起兵以從哈謀沙仗義執言梟逆黨十餘人於市浹旬而賊大率衆來復讐力戰走之擢本府判官民赴藩閩舉畱後新公廨復學舍葺郵傳舊廢畢興祀名宦

舊志

縣尹

孔公俊字師道孔子五十三世孫至正間縣尹建大同書院於學宮之東以祀紫陽

先生涖任有政績祀名宦

舊志

明

提督學政

游明字大昇江西豐城人天順七年爲按察僉事提督學政以公廉著愛民禮士政教具舉建本邑文廟大成門成化五年擢任副使仍督學力行古義以禮教率

士判復邑縣地以爲射圃卒於官八郡諸生爲位哭之邑人士久益感慕相與請

祠於學

省志

按察僉事

汪埴字仲弘休寧人嘉靖間按察僉事分部福寧倭卒起議徵海上兵備福寧埴以夷舟順風而來所至皆戰地徒備福寧無益不若移戍沿海要害爲便時寇犯本邑甚急有死罪人陳嘉任等七人在獄勇力可恃埴召令討賊贖罪七人感奮出爲先鋒遂斬首三十擒七十二人賊遁事聞詔錄其功而七人者咸貸死邑人祀之名宦

通志

知縣

時執亮東平州人洪武四年由儒士宰同廉察公慎以禮讓導民不事刑罰民宜而安之祀名宦

王琬華亭人永樂十八年由監生知縣事下士愛民不避權勢陞通州知州祀名宦
劉性同麗水人永樂中由進士知縣事有政績去後民猶思之陞河南副使祀名宦

以上舊志

朱徽新城人正統中由舉人爲令慈祥愷惻以愛民爲先務有循聲祀名宦

閩書舊志

張遜字時敏無錫人舉人成化九年來任知縣興學校潔己愛民刑清政舉輯縣志

重建大同書院嘗爲扁揭中堂題曰民不畏吾嚴而畏吾廉不服吾能而服吾公

公則能生明廉則民不擾擢知福寧州百姓遮道攀留有十數父老齎金數斤爲

贖不受送至三山復峻卻之邑人爲立卻金亭於榕溪之上勒碑其下都御史傅

鎮有記祀名宦

閩書舊志

張伋諸暨人成化十五年知縣存心愛民政簡刑清而事畢辦當道廉其循良將疏

薦之卒於官民爲立碑以記思慕祀名宦

龍越廬陵人由進士宏治九年任知縣爲政能持平得大體恤民簡役邑人愛戴勿

諉祀名宦

趙汝弼新會人爲白沙陳獻章高弟由舉人正德十三年任知縣邑創殘凋敝幾不

能生至則教養生息興利除害薄賦寬輸鋤奸抑豪振風易俗勸學右文杜私謁

卻苞苴聽訟平允庭無冤獄境內向多伏莽汝弼深惟患本恤其不得已者憫其

陷於不知者廉其跳躅不率者嚴加懲創不旬月幡然更新閭閻安堵先是歲洊

饑自汝弼至雨暘時若歲以屢豐郊原有一莖數穗之瑞其曰二氣三光四時五行皆以其穗數名之總鎮羅公舉行陞典以汝弼爲賢能之冠首致禮幣焉

笱江集

邵旭仁和人由監生嘉靖二年任知縣於民絲毫無所取政尙寬和而斷決仍明敏

無滯以廉愛稱祀名宦

以上舊志

許仁字元夫仁和人嘉靖間以舉人授巢縣教諭擢南郟城令調德化毀淫祠改社

學建公署治橋梁旋調邑知縣未久罷去性執義而往多介少通生平邃於經學

諸所著論皆折衷經傳發前人所未發

雍正志稿 吳錫琮探

葉允昌字順德號後林慈谿人嘉靖十三年知縣邑西有西安橋護闌閒圯梁石中

折勢不久支允昌捐資募役治其傾壞不旬月竣工行人利賴又修建啓聖鄉賢

名宦各祠城郭山川井野市田原藪渠麓利罔不興邑人許福作重修西安橋記

既去民尤思之

藝文志 舊志

袁杉號芳洲揚州人舉人嘉靖二十一年知縣秉道守禮無所文飾其治民不動聲

色務爲馴擾愷悌忠篤甫六月民歌頌徧城鄉巡按徐南湖獎之曰惟爾同教行

奸戢獄訟弗繁長吏惟爾有勳余乃德嘉乃丕績亦以爲閩著令云

林次崖文集 舊志

郭山號景崖嘉定人舉人嘉靖二十二年知縣天性篤孝勤循禮法涖縣事以不肯折腰取嗔當道一無所動而實任誠信卒以取譽時方嘉其古誼爭效慕之會以憂去百姓攀轅者甚衆祀名宦

王仲玉號青岡安福人舉人嘉靖二十五年知縣下車值天旱祈雨輒應首詢民瘼苦莫如盜於是嚴封域謹烽墩戒保伍飭材官修器械值海寇攻南安轉安溪越入同安境內之人各舉其職用是豺狼遁散閭閻獲安撫按移檄交獎之其爲政

廉勤自持忠厚恤物芟煩剔蠹吏民畏服以疾去祀名宦

次崖文集舊志

彭士卓號石坡番禺人舉人嘉靖二十八年知縣下車採風問俗首以孝弟教民凡博奕聲伎屠牛及居喪用浮屠諸舊習悉嚴痛治之既乃加意休養催科從緩鮮額外無名之征用度有經無犯禮傷財之患大小之獄必盡其情有干法者不少假借請託不行苞苴不入不徇里正之私懸榜示禁知吏能爲奸始漸遠而終絕之尤加意學校作興人才文士彬彬庚戌夏秋兩次遇旱士卓率諸生吏民竭誠

祈禱皆不踰日而應民咸尸祝之

次崖文集

李時芳號新溪廣西人嘉靖三十七年以興化同知攝知縣春三月倭寇數千攻城

率士民分堞而守晝夜巡督殺賊賊始引去數萬生靈獲全夏五月賊復來攻淫
雨經旬不止城垣崩塌多處或十丈或二十丈民命危於累卵時芳募諸灣之兵
以身率之晝夜防守夜雨如注張蓋臨城當矢石之衝以身爲捍蔽民復賴以生
全其勞與功視三月尤甚賊既退諸生以前官因賊改築城垣儒學櫺星二門因
之逼斗形家所忌議將城垣拓啟五十丈深二丈時芳捐俸爲倡不數月而告成
功同人謂禦寇以衛民攻城以興學其功鉅爲文紀之先是時芳攝惠安能爲民
禦災捍患惠民思其澤亦紀績焉

次崖文集

譚維鼎字朝鉉號瓶臺新會人舉人嘉靖三十七年知縣下車周詢民隱平賦稅審
徭役均勞逸節財用凡可致民康乂者殫力爲之尤加意學校朔望與諸生講論
多所發明四時攷校差等第以示激勸獄大小必盡情吏不得高下其手時倭寇
充斥告當路請援兵修城池簡軍實多方捍禦擒倭酋阿士機等於浯洲招撫林
三顯藉其策破揚三擒黃大壯追鄭大果王子琪於安溪馘之致馬三岱於庭下
值賊攻南關以兵授岱立解其圍劇寇數萬一朝效順邑藉以安庚申夏旱齋戒
沐浴率屬虔禱澍雨疊沛四郊沾足歲以大豐陞本府同知歷廣西僉事

閩書次崖文集

胡文宗廬陵人舉人嘉靖間由府佐署縣篆最久性古淡學問操履爲時所推涖官只携一僕奉身之物雖寒士不能堪而處之裕如也同人有甘棠之恩

鄆一相號宜亭豐城人進士嘉靖中知縣淳厚端潔人不得干有訟至庭輒誠動而理遣之逋賦者諭以義皆欣然樂輸邑被倭後財力彫疲極意培養閔貧士單寒清復溪塅南橋邱稅爲勢家所有者半代酷權之需半充學租以惠士凡急難婚喪皆取資焉復以端士習育人材爲己任旌別課試殫厥心力人士改觀以其餘

力校輯邑乘補文獻之遺擢廬州同知

閩書參本官題名碑記

萬善號壇溪南昌人由諸生卒業成均嘉靖間任縣丞小心敬畏毫不苟取亦不稍爲瞻徇署邑篆催徵錢糧常數之外無溢取聽斷獄訟得情之中常哀矜羣下爲奸稍覺輒窮治無所貸人多畏避鮮犯者擢山東寧海州判去同民思之次崖文集舊志徐待鄞縣人由進士萬歷間知縣事有氣度能愛民如子於文學之士尤優禮焉以

循聲擢御史

閩書

曾如海臨川人萬歷壬辰進士二十二年知縣意念端而操履嚴力鋤賭盜肅革苞苴兩造在庭平心質問片言剖析民自以平而不冤遇旱步赤日拜泥塗中爲民

請命緩推科弛敲扑捐俸以爲賑貸計復繕葺城垣以嚴干掖有備無患浹歲卒於官蕭然囊橐臨易簣猶不妄用一印百姓哀而思之祀名宦

清白堂稿

洪世俊字用章號含初歙縣人萬歷乙未進士二十五年知縣下車察民利病銳意興除吏畏之如負霜民懷之如挾纊賦稅按額徵輸不責浮羨訟牘據情剖決兩造厭服獨治猾與盜最嚴曰是戕吾赤子者擄捕椎牛之禁三尺無佚謂厲耕教惰且爲盜階自是敗類者惴惴自遠會礦稅議興中官四出責礦則曰同故無礦也責稅則曰民貧安取摧哉既力爭不免則請受稅額而官輸之無任惡少年包收倍取竟得輸課無缺民不知權兩陽所禱輒應辛丑早步行烈日中往返數十里以雩澍雨大沛搜廢觀田二百餘畝歸租於學以贍士復用刑家言以學宮之前文峰不卓建塔城東南隅鳳山之巔於是弦誦益廣文學斌斌明年許繹遂魁會闈在任六年愷悌根心待赤子惻然如傷其强有力侮平民者毫不少貸丁父艱歸後爲本省參政歷官太常寺卿既去之明年民建祠祀之同邑長有祠自世

俊始

遜菴全集

王世德永康人進士萬歷三十年知縣臨事屹然如山雖貴勢不能撓戴星而理賦

同安縣志 卷之二十三
無宿逋獄無滯案近習畏威豪右惕法值中官權酷奸徒乘間投之爲窟穴稅額視他邑獨夥世德嚴持三尺於是羣奸屏跡境內晏如未三載調知閩縣耆老紳士歌頌之章積牘盈尺晉江黃鴻翔錄而序之

李春開字晦美號青岱廣昌人萬歷丁酉舉人三十七年知縣稽古好文重修文公書院清復銅魚修葺城堞盜賊斂迹囹圄空虛民苦糧累爲減梵天奇江之加增民苦代旁邑輸爲停嘉禾之倉穀先是稅璫方興同安額派八十緡而奸民蔡德邵等投監充牙因緣爲市復加舊額之半增四十緡於是公稅一私稅十舊者剝肉新者椎髓商民交困嗣晉江安溪額外之稅已蠲而同稅如故春開問民疾苦曰是負戴販鬻者獨匪民哉會直指陸夢祖行部至同舖民奔訴縣庭求申春開爲援例力請罷之得報可而撫軍猶以額故難之下藩司議事幾格而邑民劉某吳某葉某復以官牙奉藩司得輸稅充餉商民皇皇直指採緡紳言檄縣而詞加峻春開乃獲以地稅香資議抵及正諸官牙罪而加稅始得盡蠲撫軍亦遂報允商民歡聲雷動勒碑溪南以紀之後以察謝官遂不復出先是辛亥秋春開禱雨應時民建亭於邑東顏曰喜雨及去益思其德卽亭前爲祠設位祀焉

黃文星字鮮生潛山人進士萬歷四十一年知縣冲夷不競俸入之外未嘗苟取一錢邑被水田荒饑民載道殍者相屬文星出俸賑之死者給櫛聽訟平情察理不取贖鍰民爲感化訟牘以少尤加意作人學租給發以時士有被冤者必爲白之

校士尤多藻鑑清白堂稿

徐應秋字君義號雲林西安人萬曆丙辰進士四十四年知縣下車見學宮廢墜捐俸修之邑人蔡復一爲之記其爲政御下寬愛民切課士勤大小之獄必以情待縉紳必以禮苞苴絕於庭干謁絕於室欺蔽絕於左右魚肉絕於閭巷不動聲色不煩借聽而幽隱重難之事了然胸中政成民服調任莆田同民跋涉千餘里詣巡按乞留上官爲動而部移已不及追去而民益思之舊志參節清白堂稿

李燦然字伯弢號任明縉雲人進士萬歷四十八年知縣識定才敏凡讞獄之隱微風教之大關錢穀之解徵壇廟之修建殫精釐蠹犂然具舉值紅夷竊窺邑治戒嚴乃調募水陸兵士支給軍需置炮臺備火器出國廩以賑窮民倉猝立辦於是夷舟遠遁而災民亦免阽危刻有吏牘蔡獻臣爲之序秩滿內陞同民祀之名宦

節清白堂稿

曹履泰號方城海鹽人天啟元年乙丑進士任邑令停征甘於考拙以紓饑饉授兵
緩於登陴以息負任無情之辭不可惑以聽不吐之剛不可刼以威潔己不緇推
誠盡下誨多士豈樂有恩而務閑之以禮接縉紳披衷見素而不可干以私旱則
蔬食步禱時鄭芝龍刼衆出沒海島中履素嚴保甲練鄉勇諭民以自衛有暴子
弟從賊者按實立置之法招撫議起未幾芝龍就撫同黨李魁奇挾鐘斌以叛履
泰乃陰攜其黨不數日魁奇就擒斌投水死上官倚履泰爲重白礁鄉有水涵漑
田數頃爲豪家所壅民苦偏枯爲均畫而疏通之同井普徧中左所遠居海上寇
嘗火其舟民爭圖取舟備戰艦又見商舟至則留之給直無時商人以爲苦貨海
者以粟及夷資資至豪悍藉稅公家稅且倍徙民爲賊掠者卒得之反以爲俘冒
邀功履泰命解商舟禁私稅釋良民由是商民俱賴之邑城及中左所俱勒石紀
德旋擢吏部給事中履泰以芝龍雖就撫性反覆終爲害乃疏論曰長勝之算在
於自強不拔之業存乎根本烏附可攻毒而續命必藉參苓針砭可偶試而養生
必資五穀閩之用芝龍烏附也偶試之針砭也選將練兵舉賢治賦參苓五穀也
不此務而任一芝龍恐終無平治之日疏奏帝嘉納焉又會浙東西旱大吏不聞

上書直言復承間言戚畹不宜與政直聲益震卒罷歸子元方崇禎癸未進士知常熟縣孫三德康熙庚辰進士曾孫璣辛卯舉人

熊汝霖字夢澤號雨殷餘姚人崇禎辛未進士任知縣才高識明凡事與人一經目雖逾數歲不忘編審賦籍綱舉目張里甲稱平徵比有定限而寬閒其期鄉民稱貸樂輸不事敲撲訟有願解者聽而事關重大必須問斷者舉筆立讞兩造咸服邑西有西安橋長千餘尺癸酉冬橋西火延民舍數十家石洞燬折其七乃捐俸百金倡募紳士人民伐石鳩工委邑丞吳綸程工未幾告成人誦其德勒石紀之浯洲嘉禾烈嶼諸島及高浦鼎美去縣遙遠值紅夷劉寇交警陵風冒刃率鄉勇突擊之各遠遁屏跡咸稱爲文武兼才計薦擢吏科給事越三載士民建祠東郊祀之勒石爲記後以東閣大學士從魯王至厦島爲鄭彩所害並其幼子投海中

清白堂稿明史以上舊志

吳嶽號岱麓武進人嘉靖甲辰進士由南京國子監丞二十七年任泉州通判越年署同安篆詣學宮引諸生考問得失流觀堂字典省器備亟思振興值丁祭將屆乃命工造祭器鑄薰鑪易堂序之甃瓴新塞門之櫺檻几席鮮明欄廊斧藻外而

城垣側陷谿水紆流亦皆繕治改正頓改舊觀署任甫六月而善政宜民不可枚

舉邑人劉汝楠爲作修學記

節藝文志
吳錫琮補

熊一中豐城人由舉人正德九年任泉州府推官讞獄精明克殫其職值山海交警

邑適懸缺令一中借視縣篆力圖掃清帶征窮征一月三捷上官獎勸稠疊繪彩

交映晉江李源爲作獎勸序

再徵堂集
採全上

縣丞

何文宣興寧人由吏員正統九年爲丞有清操爲政一以慈愛爲本民稱其賢祀名宦

劉珣器永新人天順間以才德舉任縣丞時邑學久廢珣器適因公至省貸金市木

浮海而還仍勸邑人義助凡堂廡等皆重建之易木以石廓隘爲敞疊尊之屬悉

鑄以銅竹籩木豆飾以丹漆以至學宮廡宇諸生號舍饌堂庖庾藏器之所靡不

畢備其餘邑中建置經畫多出其手祀名宦

閩書

歐陽祐號武潭泰和人萬歷三十八年由上舍生任縣丞坦衷實行涖民恕而律己

嚴有不直者薄笞示儆不苛責所過鷄犬無警居五年事理民懷市井小偷每發

輒得上官數嘉獎之陞布政司都事民勒碑以紀其政

以上舊志

主簿

謝與源號淦川泗州貢生萬歷二十六年任主簿讞決若老吏凡上官所移獄大小必以情卽山陬海澨之畫界田畝尺地之紛拏不憚險遠必躬履而質之一切請託無所徇奉檄給軍需出其不意核虛冒若干人以報出納一清主者以例請叱去之捕務劇而叢嫌謗向有詭得爲利者與源獨避之若浼曰吾不任迎送役也奉委修城經畫有方直指新會何公察其廉能以詩獎之

清白堂稿

徐正敘號東溪銅陵人由監生嘉靖二十七年任主簿智足周物察微才能剴繫應變領錢穀而會計當職巡捕而姦宄息司詞訟而聽斷平視邑篆而庶政理陞河南伊王府典寶去民追思之

次崖文集
吳錫琮補

曾一甌泰和人萬歷二十一年任主簿讞決盡下催科中程一切例錢靡所問署邑篆早禱立應士民歌之代之日捐錢百緡以葺學舍前後臺使屢旌獎之在位四年告病歸邑民以不克終被其澤爲憾

清白堂
稿全上

教諭

陸佶鄞縣人正德間舉人初爲南京刑部司務謫教諭律身以正教導有方凝重老成絕去矜浮之習邑士敬而慕之陞鄒縣令去祀名宦

陸佺號北城鄞縣人嘉靖間任教諭文學該博所著宋元史發微天文地理諸書皆前人所未發本其所學以立教而以身先之科條不繁矩度自立學者靡然向風

擢漳州教授遷南京國子監學錄林希元爲文送之

次崖文集

李榕號拙修鄱陽貢生由鎮江訓導嘉靖間陞邑教諭正身率物破常格立新規以教多士啟其志意正其塗轍課其藝業隨其才陶冶之務令釋回增美咸趨於道如許升王力行諸子之於紫陽講學之外言不及利富者無所覬貧者周卹之兩署縣令刑獄每遜讓至寇盜猖獗爲民患則悉心捍衛民咸賴焉臺察屢加陞獎其考曰儀範可端操持不倦時議以爲未盡其蘊云

次崖文集

鄭燿號拙我閩縣人萬歷乙酉舉人二十年任教諭不取貧士贊餽朔望集有文行者身與角藝分其甲乙所取文平易爾雅民有與士訟者往時學博多以此獵賄不則袒民而懲士燿悉諭而遣之民亦感悟不復訟秩滿遷峽江知縣

許鍾斗文集

姚全號敬菴湖廣人萬歷三十年任教諭待士不以顯晦疏數而有異約之使範於

軌不如約者召而切責之其閑於禮法者色笑誘掖如坐春風中贊餽一無所問空刺報謁欣然也嘗作海防議切中窾要可見施行直指新會何公廉其賢移美

詞金幣旌之

清白堂稿

楊立字中吾河池州恩貢萬歷四十年由常山訓導擢邑教諭坦衷質行不知有人世機智籠飾之術訓諸生亶亶傾所聞見贊脯厚薄無所聞諸生進而坐春風中退各人人意得擢思明教授去同士思之

清白堂稿

訓導

章文仁和人宣德元年由舉人任訓導爲人持重不苟教士以身先之課文崇典則抑浮靡後累官南京禮部尙書兼太常寺卿祀名宦

王仁上虞人正德間任訓導性夷曠不屑勢利對諸生必以古人相策勵有所贈饋則市酒飲之酣歌終日錙銖不入於室祀名宦

林叢字廷桂號萬峯福寧州人萬歷二十四年任訓導忠厚明廉有一生素未面其族人與訟產而巉以不肖行叢曰誑也曖昧事豈可妄指且何不揭於未構訟之先力白之得釋歲饑邑令移委分賑嘉禾里託宿神祠不煩里保一供或倉卒不

能具釜鬻廢飧者再每詣鄉村必覈應賑者主名召里保矢之曰若有虛冒明神
殛之言畢而覬冒者相顧散去實惠均沾值大計邑令以下俱赴省留叢司管鑰
民有因奸謀殺其夫者訊供得其情令取保覓屍諭之曰汝實戎首法網豈能漏
哉已而犯皆自縊人謂片語嚴於斧鉞所居廨傾圯不任風雨每飄驟蒙衣起坐
諸生醵金謀葺治辭不應歲餘益不支割俸鳩工諸生爭助灰瓦木石不能止也
每勸諸生以敦本勵行爲先曰士跡弛鮮修卽摛藻如春華去聖賢萬里矣聞者
竦然感奮丁內艱行橐蕭然諸生爲祈卹於上官方得歸蔡獻臣爲訓同記勒於

石

清白
堂稿

劉章號起田陸川人由歲貢萬歷三十七年任訓導待士寬嚴得體處寮窠不自見
長諸生有訟久不決者得其片語立平擢藍山教諭去蔡獻臣敍以送之

鄧鸞號玉田曲江人嘉靖庚子歲貢二十二年任縣訓導誨諸生不厲聲色而教化
自行不飭廉隅而矩矱自立不曲示恩信而人自敬愛蓋其任誠無僞質樸無華

足以感人云

次崖
文集

侯崇學號龍岡曲江人由諸生應貢嘉靖間授縣訓導安分自守利欲不入於心一

以作人爲務科條不煩矩度咸在諸生受其教無不感發師範道尊署邑篆吏民
宜之遷容縣教諭去

次崖文集

王尙賢字鴻磐化州人由諸生應貢嘉靖間任邑訓導初至立條格以教諸生嚴而
不刻寬而有制以身率物口不言利巡察攷其文行優等移檄郡邑獎勵之擢甌

寧教諭去

次崖文集

車任重字宏宇南平人由歲貢萬歷三十八年任縣訓導冲夷恬淡喜怒不形卽僚
長有峭怒踔張之態以和易劑之卽諸生有陵囂詬諍之習以正直鎮之平心率
物甘貧茹素居然有道氣象五載擢弋陽教諭去

清白堂稿

泉州衛指揮

周淵洪武初爲泉州衛指揮僉事元亡陳友定故將泉州總管陳同收餘衆來攻邑
陷淵率兵擊之馳馬入陣斬同復同安

閩書

徐麒邳州人泉州衛鎮撫嘉靖季倭入寇麒斬倭首七顆於邑地方陞中左所正千

戶

閩書

浯嶼把總

沈有容字士宏宣城人萬曆己卯武舉由世蔭千戶都司僉事授指揮守浯嶼欽依把總各指揮聽其節制時遣中官監稅只及貨物而米粟不與焉征者詭云米粟不稅但稅米粟船於是度廣狹準額賦百姓苦之奔告有容曰稅船則粟不至民益艱食此假託濫征中官固不聞也卽爲走檄請命而中官果謂不聞亟罷之環海商民感德勒碑旣而太守程朝京以浯與水寨北去崇武四百里緩急莫應議徙寨於石湖屬有容經理爰度地相宜庀材鳩工監司防海寨署及玄武祠演武場次第興建屹然重鎮辛丑寇掠諸寨有容擊敗之踰月與銅山把總張萬紀敗倭於彭山洋倭踞東番爲巢四出剽掠沿海戒嚴有容陰詢其地勢部署戰艦以二十一舟出遇風存十四舟壬寅臘月乘風破浪過澎湖與倭遇諸士卒殊死戰勇氣百倍格殺數人縱火沈其六舟斬首十五級奪還男女三百七十餘人倭遂去東番旄倪壺漿餼牽來犒我師曰沈將軍再造我也海上息肩者十年事聞將吏悉敍功有容只賚白金而已甲辰七月紅毛番長韋麻郎駕三大艘泊澎湖之島通譯求市稅使高寀受賂召之也僉謂茲舉利一害百萬不可從以屬有容乃輕袍緩帶徑登其舟爲譚陳國家威德封疆峻限與夫主客勞逸之勢持久

坐困之苦聲韻雄朗意氣磊落麻郎感悟索還所賂宋金伺風便揚帆而去自是
鯨鯢消戢溟波永靖瀕海之民咸頌其德葉向高有改建浯與水寨記黃鳳翔有
沈將軍靖海碑記李光縉有卻西番記後歷登萊總兵官卒贈都督同知賜祭葬

景壁集

呼鶴鳴字元齡號凌虛籍貫未詳父良朋爲大都督掛征蠻將軍印有名西南鶴鳴
由武舉署浯銅游兵事海上諸務悉中機宜會浯與澎湖諸軍六十餘艘例當修
葺鶴鳴檄諸舟鱗集悉聽指揮冬汛期屆鷺門故無官商鶴鳴劑量省視百需悉
給如時於是諸艘更新堅好耐風濤諸商及捕逃卒往來海上得免驚心無俟祝
風於天祈浪於海兵民德之何喬遠爲作造船頌德碑蔡獻臣爲作修船記

清白堂稿

清

教諭 知縣

黃允芳甌寧人由舉人康熙十七年任教諭時海警未靖兵馬以澤宮爲駐所允芳
自捐工費蓋造營房通詳上憲檄移文廟一清所著有河洛解蓋子或問陞武清
知縣

楊芳聲宣府萬全左衛人康熙二十二年由歲貢知縣事禮士愛民下車值天旱苗

槁芳聲跣足禱乞甘霖立沛時當平臺之後徭役頗多而措置得宜改任鳳山還

擢主事

上舊志

徐名覲江寧人由監生康熙二十四年知邑縣事因時爲政綜核名實蠹胥干法之徒不得逞志修葺 聖廟興義學敦師課士綽有規模未幾去官人甚惜之

府志

蔣沛字雨田貴筑人由舉人康熙四十四年知縣事平易爲心忠厚待人聽訟時凡有株蔓輒爲解釋尤寬能文之士諸生皆樂經其品題分闈校士得第一人時論

翁焉

府志

陳國柱號砥庵湖廣漢陽人由貢生康熙四十六年任縣事清正自守賄不能誘吏不能欺正賦外毫無所取人欽其廉捐俸建文昌祠及書院於射圃地士民懷之

府志

朱奇珍字平齋號慕亭長沙人康熙五十一年由丙子舉人知縣事清白自矢秉正不阿敬禮儒士推崇先賢重修紫陽祠及高士軒催科有法減火耗革陋規清查米額不致混累詳陳積穀應分屯分賑以便民治圉囿令男女別處命案干涉者訊明卽釋不致株連朔望沿鄉宣講六諭禁緝闖徒嚴革刁風又捐建東門雉樓

並葺西南二樓修邑乘以垂獎勵癸巳分校取士得人甫年餘告養歸候代時猶

捐貲與武員公建演武廳諸處皆爲文記之

府縣志合纂

史正治孝義人由監生雍正七年知縣事邑賦向係一族統爲一戶互相推卸正治

設法清釐就各立的戶原額問賦照額輸納不相貽累邑民便之

府志

唐孝本武進人康熙庚子舉人雍正九年知縣丁外艱十三年再任建縣署義學清學租爲諸生膏火復建朝元門築南門外東西二溪堤岸保障民居至今賴之先於雍正七年知晉江縣捐買東嶽廟口塚地一所給貧民埋葬立碑以記後因名

爲唐厝埔

舊志

陳任賢福寧歲貢康熙間訓導五十年郡饑大府奏請裁漕賑濟時同安缺守令檄任賢主其事胥吏無所滋其弊窮黎得沾實惠 文廟牆垣及明倫堂爲大水所壞任賢捐貲市大木浮海至重新之

論曰陳任賢代理縣篆爲期至促而能子惠窮黎敦崇教化不存五日京兆之思蓋賢有司也可以爲世法矣

單瑞龍字皞臣浙江錢塘人乾隆壬辰進士五十二年任屬林文爽之亂同安爲過

師孔道巡撫徐嗣楨倚如左右手督師福康安初至省向督撫索義民從征不得至同安以屬瑞龍二月得三千人後被議落職擬發新疆士民赴康安凱旋行署

請留者千餘人康安為拜疏還舊職改知嘉義縣

福建通志

孫圖南河南許州人乾隆乙未進士嘉慶十二年任縣巨姓結會械鬪圖南即會營

擒數十人各杖數百將會首擬決梟示其會立解以重典力拯頹風民知畏法終

其任無械鬪人謂數十年僅見也

福建通志

白冠玉字海仙湖南華陽縣人由廩生出參左爵督師軍幕以功最獎敍花翎加同

知銜實任知縣同治四年夏奏攝同篆時逆氛甫靖冠玉蒞任後實心實政矢慎

矢勤吏民安堵無恐不數月息鬪爭通道路建考棚凡可以興利除害者靡不殫

心力而為之榜景朱堂匾額於官廨中廳以為法數月之間黎民於變喁喁向風

復濬溪通港修輪山學舍以振文風在任未一年調陞興化府去之日父老遮道

攀轅追隨十餘里猶依依不忍去云

潘文鳳同治五年任縣知事廉潔有守潔己愛民邑值小刀會匪之亂衙門被燬文

鳳抵任後重加整理燦然一新

張元鼎浙江仁和人光緒十二年爲縣知事廉謹有守士民譽之

楊文榮字華臣貴州人光緒三十二年任甫下車矢慎矢勤愛民如子剔除胥差苛勒之弊案無留牘治獄甚精明人不得干以私時適官潯盜在海面擄劫貨船商人以爲請立即輕騎減從親赴官潯鄉貨物尙陳列於庭諭之使還各貨主被拒遂於越日星夜合同文武往圍之捕獲正盜置諸法時適值冬防盜賊滋熾雖極嚴寒仍率勇梭巡無虛夜地方以安然不久陞任紳商等電乞大吏借寇不獲去之日士民拜送途爲塞其德澤之在民有如此者

馬巷通判

馮國柄浙江會稽監生嘉慶元年任馬巷通判時廳轄有班股會名目各糾黨數十莊衆械鬪不休國柄察起釁多由擄人遇控擄立點幹役數十人親臨押放嚴究主擄之犯毀其屋廬故鄉村畏威不敢私擄械鬪之風熄每鄉設鄉長族長稍有嫌隙著其約束不至釀成巨禍其績可表云